

Xtiidxza'c Jesucrist ni bacaa San Juan

Bi't Xi'n Dios loj guidxliuj

1 Diizd guia'xchej chi gad guidxliuj gacchaaw, mal yu' bèn naj xtiidx Dios. Laaman za'në Dios abi' laagajcaman naj Dios. ²Laaman mal za'në Dios diizd guia'xchej. ³Laaman been graczi ni yu'. Achetczi ni yu' niajc bal id laaman. ⁴Laaman rajp guialnaban, guíaad guialnaban guin naj bajl par gra bénguidxliuj. ⁵Bajl guin rusni bèn nacay xquiarguejn, abi' ad rajct rutëë guialnacay guin loj bajl guin.

⁶Guyu tijb bèn brii laj Waj, Dios guxhaal laaman, ⁷bidgaguieman diidx xcwent bèn naj xbajl Dios, din gac chililadx gra ree bejn laaman. ⁸Per ad Wajt goc bajl guin, bi'tzaman bidgaguieman diidx xcwent bajl guin. ⁹Din bèn naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. ¹¹Bi'taman loj ree bèn Israel, abi' majsi gojcaman bèn Israel, per ad bidxga't reeman laaman. ¹²Per, gra ree bèn bidxga'

laaman bililadx tëë reeman laaman, beenman laa reeman xi'n Dios.

¹³Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rën bejn chu' xi'nman, por guial rililadx reeman ma naj reeman xi'n Dios.

¹⁴Jesús, bèn naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyënman bejn ree gunee tëëman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. ¹⁵Chi be Waj xtiidxaman loj ree bejn, gunee man rejs, rëbaman:

—Jesús guie naj bèn ruzatan, chi rnin guial bèn zëëd xichan mazri lasajcaman guial lon, din diizd gocli mal yu'man guial lon.

¹⁶Dád rënman dunuj ree, gra dxejczy raca' dugra ree xguialnaza'caman. ¹⁷Por Moisejs banee Dios xleyaman duloj ree, per por Jesucrist bayagbee ree xhienaag rën Dios dunuj ree xhie tëë naag naj xtiidxliman. ¹⁸Ad yu't dxej waguiaa bejn Dios. Bèn naj tijbzi xi'nman. Bèn nabannë laaman balüü duloj ree xhienaag naj Dios.

**Waj b́en baroobnijs rēbaman chu naj
Jesús**

(Mt. 3:11-12; Mr. 1:7-8; Lc. 3:15-17)

¹⁹Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

²⁰Dxel be Waj diidxli loj reeman, rēbaman:

—Ad najtan naj Cristo.

²¹Abi' gunabdiidx reeman lojman stijb rēb reeman:

—¿Chuzaj? ¿Lüjn naj Elías ya, b́en badēē xtiidx Dios loj ree bejn?

Badxi' Wajn rēbaman:

—Ad najtan.

Dxel gunabdiidx reeman stijb rēb reeman:

—O, ¿lüjn naj b́en naj diidx gui't ya, b́en gudēē xtiidx Dios loj ree bejn?

Badxi'man laan rēbaman:

—Ad najtan.

²²Abi' rēb reeman:

—¿Chuzaj? Din rayal yugnē'n rusion loj ree b́en guxhaal dunujn. Guna chu najl.

²³Dxel rēb Waj loj reeman:

—Naj naj tijb b́en rbidxa' loj yujbidx: “Gol guxhal tijb nejz nali par b́en ca' guialrniabee” —zi'c rēb Isaías b́en badēē xtiidx Dios loj ree bejn.

²⁴Abi' ree b́en guxhaal ree b́enfarisew din guinieenē reeman Waj, ²⁵gunabdiidx reeman lojman, rēb reeman:

—Bal id lüjn naj Cristo, ni'qui Elías, ni'qui b́en naj diidx gui't, b́en gudēē xtiidx Dios loj ree bejn, ¿chexquiza zeel ruroobnijsil bejn?

²⁶Badxi' Waj laan rēbaman:

—Naj ruroobnijs con nijs, per lojdi no'ch tijb b́en ad wayünbeetidi.

²⁷Laaman naj b́en zēēd xichan, ni'qui xgurēchaman ad rayalt gaxhiecan guial najman b́en mazri lasajc guial lon.

²⁸Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

Jesús naj Xi'n Dios

²⁹Chi bareguiaal, baguiaa Waj zibig Jesús lod za'man, dxel rēbaman:

—Gol baguiaa, b́en guin naj b́en bacaabee Dios din guiētaman zi'c xiildoo por xtol ree b́enguidxliuj.

³⁰Laaman bazatan lojdi chi rnin: “Xichan zidnal b́en mazri lasajc guial lon, din laaman mal yu' diizd gocli guial lon.” ³¹Ni'qui naj ad gogbeetan guial laaman naj b́en gui't, per naj zialan din guroobnijsan bejn ree con nijs din chile' güünbee ree b́en Israel laaman.

³²Rēb tēē Waj loj reeman:

—Naj baguia biguiaj xSprijt Dios diizd xanyabaa zi'c tijb palom xt guijcaman. ³³Majsi ad nünbeetan laaman, per b́en guxhaal naj barobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj b́en runee xSprijt Dios.” ³⁴Naj ma baguia laaman, abi' ragbeechaawan guial laaman naj Xi'n Dios.

B́en binal ree Jesús yaloj

³⁵Chi bareguiaal, za' Waj yagaj stijb, za'nē tio'p ree xbejnman.

³⁶Abi' chi baguiaaman cadēd Jesús, dxel rēbaman loj reeman:

—Gol baguiaa, bén guinan naj zi'c xi xiildoo Dios din guiétaman por xtól bénguidxliuj.

³⁷Chi biguiejn reeman rëb Waj zian, dxel binal reeman Jesús.

³⁸Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguuilidi?

Badxi' reeman laan rëb reeman:

—Mextr, ¿ban zojbil?

³⁹Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxe.

⁴⁰Tijb ree xbejn Waj bën binal Jesús, bën bacaagdiajg ni rëb Waj, laaman brii laj Andrejs, bijch Simón Bëd. ⁴¹Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bën naj Mesías —rën guiëban Cristo.

⁴²Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

Gurejdx Jesús Felip në Natanael

⁴³Chi bareguiaal been Jesús xgab cheman niz Galilea, abi' badxaagaman Felip, zianz rëbaman: —Tanal naj.

⁴⁴Ladx Felip guin naj guiedx Betsaida, ni gajc naj ladx Andrejs con Bëd. ⁴⁵Dxel bigdiil Felip Natanael, abi' rëbaman lojman:

—Ma badxaaglojn bën ruza't Moisejs loj xlibr xleyaman, bën

ruza't ree bën badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bën Nazaret.

⁴⁶Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

⁴⁷Chi baguiaa Jesús zëed Natanael, rëbaman:

—Guie zëed tijb bën naj quijb bën Israel, abi' ad rusquieetaman.

⁴⁸Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

⁴⁹Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaal.

⁵¹Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguiajt tëë reeman xt guijc Bén guxhaal Dios loj guidxliuj.

Wej Jesús loj tijb guialruxhliaa

2 Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, ²abi' në Jesús con ree xbejnman guneë reeman persi wej reeman loj lanij guin. ³Chi babidx vin, dxel rëb xniaa Jesús lojman:

—Achetri vin rajp reeman.

⁴Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

⁵Per xniaaman rëb gajcaman loj ree bën cayüjn mandad yagaj:

—Gol been gra ni naman.

⁶Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. ⁷Abi' rëb Jesús loj ree bën rüjn mandad guin:

—Gol bacha ree guiajs guie nijs.

Dxel bachadi reeman laa reen,

⁸abi' rëbaman loj reeman:

—Yan gol gulëë ta'nán, gol bigdëen loj bën canabee loj lanij guie.

Dxel bigdëë reeman laan lojman,

⁹abi' bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, ¹⁰rëbaman lojx:

—Graczi bejn rgui's yaløj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹Ni guin naj milagr yaløj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹²Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëë Jesús bën ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³Chi ma zidyob pascw xlanij ree bën Israel, wej Jesús Jerusalén.

¹⁴Abi' ro' yadooro' bidxaaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren. ¹⁵Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexguiat tëëman xmex reeman. ¹⁶Dxel rëbaman loj ree bën cuto' palom: —iGol babëë reeb guie! iAd rüjnnëdi lidx da Dadan zi'c luguia'!

¹⁷Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸Zianz rëb ree bën Israel lojman: —¿Xhie milagr gulüül du lojn din yayagbeen guial rajpil guialrniabee güünl zian?

¹⁹Badxi' Jesús laan rëbaman: —Gol base'n yadoo guie, naj yayün laan loj choon dxejzi.

²⁰Dxel rëb ree bën Israel guin lojman:

—Tiubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

²¹Per Jesús xcuerp gajcaman ruza'taman chi ruza'taman yadoo guin. ²²Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

Jesús nünbee xixgab gra bejn

²³Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. ²⁵Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

Bigneenë Nicodemo Jesús

3 Guyu tijb bënfarisew brii lajman Nicodemo, gojcaman tijb guxtis loj ree bën Israel. ²Abi' wejman bignajman Jesús tijb guxhin, dxel rëbaman lojman: —Mextr, rayagbeen guial Dios guxhaal lüj din gulüül dunujn, din achutzci zajc güün lasa' ree milagr ni rüjn bal id za'në Dios laaman.

³Dxel rëb Jesús:

—Diidxiczi rnin lüj, bën ad zajlt stijb, ad zajct guguaaaman xguialrniabee Dios.

⁴Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi' galaman stijb?

⁵Badxi' Jesús laan rëbaman:

—Diidxiczi rnin, bën ad riobnijst ad nabannë tëëtaman xSprijt Dios ad zile't yayuman loj xguialrniabee Dios. ⁶Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban.

⁷Ad bal radxa lojl guial rnin: “Rüjn naguiejn gal bejn stijb.” ⁸Din zi'c

rbi' bi gralad abi' majsi rigueijnl chi rbi'n, per ni'quid ragbeetil ban zëëdan o ban zën. Ziangajc naj xSprijt Dios con gra ree bën nabannë laaman.

⁹Dxel rëb Nicodemo lojman:

—¿Xhienaag rajc zian?

¹⁰Badxi' Jesúsán rëbaman:

—¿Lüj, naj mextr loj ree bën Israel, ad rignia'til gra ree ni guin ya? ¹¹Diidxiczi rnin lojl, raneen ni rayagbeen ni baguiaa tëën, per lëjt ad rililadxtidi ni ranan. ¹²Bal id rililadxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

¹³Achut wayej xanyabaa, tijbzi bën biguiat diizd xanyabaa, Bén guxhaal Dios loj guidxliuj. ¹⁴Abi' zi'c bacaa Moisejs bëël guuib loj yag niz loj yujbidx, ziangajc Bén guxhaal Dios loj guidxliuj, gucaa reeman laaman loj crüjz, ¹⁵din gra bën chililadx laaman ad zanijt reeman loj Dios, gap reeman guialnaban tiblayaa con laaman.

Rën Dios bejn

¹⁶Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chililadx laaman ad zanijt reeman loj Dios, gap reeman guialnaban tiblayaa con laaman. ¹⁷Din Dios ad guxhaalt xi'nman loj guidxliuj din gudëëdaman bejn casti, guxhaalaman laaman din gap ree bejn perdon loj Dios.

¹⁸Bën rililadx Xi'n Dios ad rayaltaman xcasti Dios. Per bën ad rililadxt, laaman ma rayal casti

guial ad riladxtaman Xi'n Dios, b́en naj tijbzi xi'nman. ¹⁹B́en ad riladxt ree rayal reeman casti, din yan ni bi't b́en naj xbajl Dios, mazri bayuladx reeman nejz mal, guial ŕijn reeman ganax ni mal. ²⁰Graczi ree b́en ŕijn ni mal ad ruladxtczi reeman bajl guin, ad rbigt reeman lojn, chit́eé guiguien ni mal caýijn reeman. ²¹Per ree b́en naban zi'c rayal loj Dios, laa reeman rbig loj xbajlaman din guiguien guial graczi ni caýijn reeman naj ni ŕen Dios.

**Waj b́en baroobnijs
ruza'taman Jesús stijb**

²²Chi gudéd gojc zian, Jesús con ree xbejnman wej reeman niz Judea, lod guzuńeman laa reeman tio'p choon dxej, ni baroobnijs reeman bejn ree. ²³Négajc Waj curoobnijs bejn ree luguedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. ²⁴Laan goc chi gad Waj chu' ladxguiib.

²⁵Per b́elzi ree xbejn Waj, con za tio'p choon gajc ree b́en Israel guzuloj cadildiidx reeman por xcostumbr reeman guial xhienaag gac reeman naya. ²⁶Dxel biguedx reeman loj Waj:

—Mextr, b́en guzuńel stiblad ro' guiiw Jordán, b́en bel xtiidx du lojn, ńe laaman curoobnijs bejn ree abi' gra reeman zinal laaman.

²⁷Badxi' Waj laan ŕebaman: —Achut zajc gap guialrniabee bal id Dios gud́eé laan. ²⁸Léjt ragbee guial biguiejndi ŕen guial ad najtan naj Cristo, naj guneed lojman zidgagojnan por laaman. ²⁹Dunuj ree rayagbee guial loj guialruxhliiaa,

xin za'né biingunaa guin, laaxan cuxhliiaa, guiaád xmiwix xin za' con laax rabaané da'tix laax chi riguiejnx rnieex. Zianganajc naj dád rabaané'n laaman. ³⁰Abi' laaman gusnuu gacaman mazri b́en zojbloj, guiaád naj gusnuu gacan b́en ad lasajct guial lojman.

B́en źeéd xanyabaa

³¹'Din b́en źeéd diizd xanyabaa, laaman naj b́en rniabee loj gra. Per b́enguidxliuj, b́enguidxliujzi najman abi' ganax ni yu' loj guidxliuj ruza'taman. Per B́en źeéd diizd xanyabaa laaman rniabee gra, ³²abi' ŕuman ni ma baguiaaman ni ma biguiejn t́eéman, per achut riladx ni rnieeman. ³³Bal yu' b́en riladx xtiidxaman, zian rguien guial ni diidxli naj xtiidx Dios. ³⁴Abi' b́en źeéd por Dios, laaman ŕu xtiidx Dios guial guidiblagaa bad́eéd Dios xSprijtaman lojman. ³⁵Dios ŕen Xi'nman abi' basa'nman gra lojman. ³⁶Abi' chut́eéz b́en riladx Xi'nman, laaman rajp guialnaban tiblayaa loj Dios. Per b́en ad rtiéjbt chililadx, ad rajptaman guialnaban guin, laaman rayal xcasti Dios.

Jesús con b́engunaa Samaria

4 Gogbee ree b́enfarisew guial mazri zien bejn ma zinal Dad Jesús mazri zien t́eé bejn ruroobnijsaman guial loj Waj, ²majsi diidxliczi ad Jesústán ruroobnijs bejn ree, b́en naj ree xbejnman ruroobnijs. ³Chi gogbeeman zian dxel briiman niz Judea źeman niz Galilea stijb. ⁴Per chi źeman niz Galilea been naguiejn gudédaman niz Samaria.

⁵Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. ⁶Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. ^{7,8}Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman: —Bazaladx ta'n xnijsil guië'n.

⁹Per guial ad rnieenët lasa' ree bën Israel zagdxe con ree bën Samaria, badxi' béngunaa guinan rëbaman: —¿Chexquiza zeel rniabil nijs lon najl bën Israel awa bën Samaria naj?

(Din bën Israel ree ad rnieenët reeman bën Samaria ree zagdxe.)

¹⁰Badxi' Jesús laan rëbaman: —Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

¹¹Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban?

¹²Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³Badxi' Jesús laan rëbaman: —Graczi ree bën rë' nijs guie re'c reeman nijs stijb. ¹⁴Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooan zi'c lod ad rbëzt

rajch nijs, abi' nijs guin gudëë guialnaban tiblyayaa.

¹⁵Dxel rëb béngunaa guin lojman: —Dad, baneë nijs guin lon, chitëë che'cran nijs ad zial tëëtran guidca'n nijs guie.

¹⁶Rëb Jesús lojman: —Bignee lacheelil, dxel yaguaaadil guie.

¹⁷Badxi' béngunaa guinan rëbaman: —Achut da bénguaaawan yu'.

Dxel rëb Jesús: —Waliquil achut lacheelil yu', ¹⁸din ma gojc gaay xinguaaaw rtia' lüj, abi' yan xin zojbnël ad lacheeltilan. Zeel waliqui ni nal.

¹⁹Chi bigueijnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. ²⁰Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guiniajchi' bejn laaman.

²¹Badxi' Jesús an rëbaman: —Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén. ²²Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bën Israel grii bën güün bejn ree perdon. ²³Abi' ma bidxin dxej ni gra ree bën diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bën rniajchi' laaman. ²⁴Dios naj Sprijt, abi' bën rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵Dxel rëb béngunaa guin lojman:
—Naj ragbee gui't Bén naj Mesías, Bén la gajc, Cristo. Abi' chi gui'taman, laaman gusignia' dunuj ree gran.

²⁶Abi' rëb Jesús:
—Najn naj Bén zii, laaman caneenë lüj.

²⁷Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman.

²⁸Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹—Gol taquiaa tijb Bén ma na graczi ni ma benan. ¿Nid laaman naj Cristo ya?

³⁰Dxel brii reeman luguiedx guin zë reeman lod za' Jesús. ³¹Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³²Per rëbaman loj reeman:

—Laa da guialrawan yu', ni ad nünbeetidi.

³³Dxel guzuloj canabdiidx loj lasa' reeman rëb reeman:

—¿Ni yu' chu bidnä ni gudawaman ya'n?

³⁴Dxel rëb Jesús loj reeman:

—Da guialrawan naj günan zi'c rën Dios, Bén guxhaal naj abi' guloox günan ni naman. ³⁵Lëjt rëb: “Ryaadx zatajp bëëw din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen. ³⁶Abi' Bén rato'p loj guiniaa guin, rtia'man ni

rayalaman por dxiin ni rüjnman. Guiáad ni rato'paman naj par lod yu' guialnaban tiblyaa. Dxel zi'c Bén rxübin zi'c Bén rato'p, rabaa reeman tiblojzi. ³⁷Waliqui ni rëb ree bejn: “Ben ren rxübin, ben ren rato'p guialnaza'c.” ³⁸Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

³⁹Zien ree Bén Samaria bililadx Jesús guial be béngunaa guin diidx loj reeman rëbaman: “Ma gunaman graczi ni benan.” ⁴⁰Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. ⁴¹Abi' mazri zien reeman bililadx laaman chi biguiejn reeman ni rnieeman, ⁴²dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, Bén yabëë bénguidxliuj loj dol.

Bayüjn Jesús xi'n xbejn tijb rey

⁴³Chi goc tio'p dxej guin, baza Jesús niz Samaria abi' zëman niz Galilea, ⁴⁴majsi laagajcaman rëb guial ni'qui tijb Bén rudëë xtiidx Dios loj ree bejn ad rajpt reeman laaman respejt ladx gajcaman. ⁴⁵Per chi badxinman niz Galilea, Bén niz ni ree baca' reeman laaman zagdxë. Din në laa reeman wej lanij pascw Jerusalén, abi' baguiaa reeman gra ni beenman ni. ⁴⁶Chi za'man niz ni wejman

Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman.

⁴⁷Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guietix. ⁴⁸Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

⁴⁹Per rëb bën guin:

—Dad, yo' yan gajc, naga gad da xi'nman guiet.

⁵⁰Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman. ⁵¹La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

⁵²Dxel gunabdiidxaman loj reeman, rëbaman:

—¿Xhie hor guzuloj banaa da xi'nman?

Abi' rëb reeman lojman:

—Nieey cost raca tijb wadx bariix xliaa.

⁵³Dxel basaaladx bën guin guial hor ziin rëb Jesús lojman: “Ma bayajc xi'nl.” Abi' laaman në gra bën zojb lidxaman bililadx reeman Jesús. ⁵⁴Ni ne naj milagr barojp ni been Jesús niz Galilea chi bazaman niz Judea.

Bayüjn Jesús tijb bën ad rajct rza

5 Chi gudëd gojc zian, guyu tijb xlanij ree bën Israel, abi' wej Jesús Jerusalén. ²Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³Yagaj

riga' zien ree bënragxuu, zi'c ree bën lutia'p, në ree bencoj con ree bën ad rajctczi rza, cabëz reeman guiniib nijs yu' lën tanc guin. ⁴Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiiban, rayajcaman xhietëez gualguuidxan rajcaman. ⁵Dxel loj ree bën guin no'ch tijb bejn, ma gojc zi'ctiubichoon ijz ragxuuman. ⁶Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rënl ya yayajquil?

⁷Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸Dxel rëb Jesús lojman:

—Bixche, baca' ni naal loj, baguiaj.

⁹Loj hor guin gajc bayajc bën guin, baca' ni naaman loj abi' guzuloj cazaman. Per guial dxex zii naj dxex raziiladx ree bën Israel, ¹⁰zianz bën Israel zinal ree ley rëb reeman loj bën bayajc guin:

—Yandxex naj dxex raziiladx bejn, ad zajct yaca' ni go'til loj.

¹¹Badxi' bën guinan rëbaman:

—Bën bayüjn naj naman: “Baca' ni naal loj, baguiaj.”

¹²Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

¹³Per bën guin ad ragbeetaman chunin bayüjn laaman guial bi'ch Jesús loj ree benzien riga' yagaj. ¹⁴Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

¹⁵Dxel zia bén guin abi' biguiedxaman loj ree bén Israel guial Jesús naj bén bayüjn laaman.

¹⁶Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. ¹⁷Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹Rëb Jesús loj reeman:

—Diidxiczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. ²⁰Din Dios rën xi'nman abi' rulüüman laaman gra ree ni rüjnman. Abi' mazri naj ni guluü loj xi'nman ni yadxa da't lojdi. ²¹Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bén nüjnman xgab. ²²Abi' ad Diost rüjn guialguxtis, bazuj xi'nman din güünman guialguxtis, ²³din gap gra ree bejn xi'nman respejt zi'cgajc rajp reeman laaman respejt. Bén ad rajpt Xi'n Dios respejt, ad rajp gajctaman respejt xDadaman Dios, bén guxhaal laaman.

²⁴Diidxiczi rnin: Bén ruzoob da diidxan riladx tëëman Dios, bén guxhaal naj, laaman ma rajp guialnaban tiblyaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman.

²⁵Diidxiczi rnin ma bidxin hor, abi' yandxej gajcan, bén naj ree zi'c bengüt loj Dios gucaagdiajg reeman cha' xi'nman. Abi' ree bén guzoob xtiidxaman zajp reeman guialnaban tiblyaa con Dios. ²⁶Din zi'c rajp Dios guialnaban, lasa'gajc guialnaban guin ma badëë loj xi'nman, ²⁷abi' badëëman guialrniabee lojman din güünman guialguxtis, din laaman naj Bén guxhaal Dios loj guidxliuj. ²⁸Ad bal radxa lojdi ni rnin, din zadxin dxej guien gra ree bengüt cha' Xi'n Dios, ²⁹abi' yarii reeman lën baa. Dxel bén been ree ni ruladx Dios, yaban reeman, din gap reeman guialnaban tiblyaa con laaman. Guiáad ree bén been ni mal, yaban reeman din yayal reeman casti ni rayal reeman.

Ni rulüü guialrniabee rajp Jesús

³⁰Achet zajc güünan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaben, rünanan zi'c rën da Dadan bén guxhaal naj. ³¹Bal gü da diidx gajcan, achet lasajcan. ³²Per yu' ben ren rü da diidxan, abi' ragbeechaawan guial diidxlin. ³³Lëjt guxhaal bén bignabdiidx ree loj Waj, abi' laaman ganax ni diidxli gunaman. ³⁴Majsi ad ryaadxt yadxi'n ni gunee ree bejn por naj, per canin

lojdi ni guna Waj din chililadxidi gap tēēdi perdon. ³⁵Waj goc zi'cgajczi tijb bajl ni re'c abi' rusnin, gui'aad lējt dád babaadi bidxga'di tijb tiamp ni balüüman lējt. ³⁶Per naj mazri naj ni gulün lējt guial loj ni balüü Waj lējt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj. ³⁷Nē da Dadan bēn guxhaal naj, laagajcaman be da diidxan, majsi ad waguiejtidi cha'man ad waguiaa tēētidi laaman. ³⁸Ad yu'guijc tēētidi xtiidxaman zeel ad riladxtidi bēn guxhaalaman. ³⁹Lējt con cudad da't roolidi loj xtiidx Dios, guial ragbeedi con laan gapidi guialnaban tiblayaa con Dios. Abi' majsi loj xtiidx gajcaman ruza't naj, ⁴⁰per ad rēntidi chililadxidi naj din gapidi guialnaban guin. ⁴¹'Naj ad raguiltan guilies ree bejn da valoran. ⁴²Abi' ragbeechaawan guial ad walit rēndi Dios. ⁴³Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. ⁴⁴¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxe loj bēn naj tijbzi Dios. ⁴⁵Ad bal naladxidi naj gabec xguialquiadi loj Dios, din bēn cwe'c xguialquiadi naj Moisejs, bēn rbēzidi güün lējt yudar. ⁴⁶Bal bililadxidi ni rēb Moisejs, nē naj zaliladxidi, din Moisejs bacaa loj xtiidx Dios lod ruza't naj. ⁴⁷Per bal id rililadxidi ni bacaaman, ¿xoza chililadxidi ni rnin lējt?

Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

6 Chi gudēd gojc zian, dxel zē Jesús stiblad ro'nijsdoo

riga' niz Galilea, nijsdoo la gajc Tiberias. ²Bénguixiuj binal laaman, guial ruguiaa reeman milagr ree ni rüjnman rayüjnman bēnragxuu ree. ³Dxel wē'paman tijb ruguia' abi' gurenē ree xbejnman. ⁴Dxejzii ree ma zidyob pascw, xlanij ree bēn Israel. ⁵Chi gules loj Jesús, abi' baguiaaman zēēd ree bénguixiuj lod za'man, dxel rēbaman loj Felip: —¿Ban yusii ree ni gaw gra ree bēn guin?

⁶Per rēbzaman zian din guidoon xhie guiēb Felip, din Jesús mal ragbeeman xhie güünman. ⁷Dxel badxi' Felipan rēbaman:

—Ni'qui ni rüjn bejn gan loj xhujn bēēw ad zadaant yo' guiadxtil din gaw tijbgaj reeman majsi tiblia'dogajzan.

⁸Dxel gunee stijb xbejn Jesús, bēn la Andrejs bijch Simón Bēd, rēbaman:

⁹—Laa tijb xindo ca' gaay guiadxtil con zatio'p bējl za' guie. Per, ¿tē'czzi taan ni guin par gra bēn guin?

¹⁰Dxel rēb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xingüiaaw. ¹¹Dxel cwa' Jesús guiadxtil guin ree. Chi gulox badēēman quixtēē loj Dios, badēēman laa reen loj ree xbejnman persi gudi's reeman laa reen loj gra ree bēn zojb yagaj. Ziangajc beenman con ree bējl guin, badēēman laa reen zi'ctzi guyēn reeman. ¹²Chi ma bixienladx reeman, dxel rēbaman loj ree xbejnman:

—Gol bato'p gra ree ni laay baya'n, chitëë xhie guizëëb.

¹³Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. ¹⁴Chi baguiaa ree bejn milagr narooob ni been Jesús, rëb reeman:

—Walican bën guin naj bën rudëë xtiidx Dios loj ree bejn, bën naj gui't loj guidxliuj.

¹⁵Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guijc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶Chi ma cabej guiaal, biguiajt ree xbejn Jesús ro'nijsdoo, ¹⁷guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. ¹⁸Dxel guzuloj cabi' bidoxh abi' wajs xtüjp nijs guin. ¹⁹Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman. ²⁰Per rëbaman loj reeman:

—iNajn, ad rdxebidi!

²¹Dxel guyën reeman niuman loj barcw guin, per hor guin gajc bidxin reeman lod zë reeman.

Bigdiil ree bën bayaan Jesús laaman

²²Chi bareguiaal, bën riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. ²³Loj hor

zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëd Jesús quixtëë loj Dios. ²⁴Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bën rudëëd guialnaban

²⁵Chi bidxin reeman Capernaum, badxeyl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

²⁶Badxi' Jesúsán rëbaman:

—Ragbeechaawan, raguiliidi naj guial gudawidi xt bigdxinlaxidi, ad guial baguiaatidi milagr ree ni rünan. ²⁷Ad chu'di xgab guialraw rara, gol guyu xgab guialraw runee guialnaban tiblyaya con Dios. Din laan naj ni runee Bën guxhaal Dios loj guidxliuj guial ma bacaabee Dios laaman.

²⁸Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹Badxi' Jesús laan rëbaman:

—Ni rën Dios güüendi naj guial chililaxidi bën guxhaalaman loj guidxliuj.

³⁰Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëë ree milagr rüjn! ³¹Dux bëngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëëman guiadxtil biajb xanyabaa loj reeman gudaw reeman.”

³²Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj bën runee quijb guiadxtil za xanyabaa. ³³Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

³⁴Abi' rëb reeman lojman:

—Dad, baneer guiadxtil guin du lojn zianczi.

³⁵Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guilianman, ziangajc bën chililadx naj, ad yu't dxej che'caman nijs. ³⁶Per zi'c rnin lojdi, majsi ma baguiaadi naj, ad rliiladxtidi naj. ³⁷Gra ree bën ma baneer da Dadan lon, gui't reeman lon, abi' bën gui't lon, ad zasiejctan laaman. ³⁸Din naj zial diizd xanyabaa, zidgaguienan zi'c rën da Dadan bën guxhaal naj, ad par güntan zi'c rënan. ³⁹Da Dadan bën guxhaal naj, ni rënman naj guial gra ree bën baneeman lon ni'qui tijb reeman ad zunijttan, rënman yasbanan laa reeman chi nit guidxliuj. ⁴⁰Din rënman guial gra ree bën yayagbee Xi'nman chililadx tëë reeman laaman, gap reeman guialnaban tiblayaa con laaman, guíaad naj yasban laa reeman chi nit guidxliuj.

⁴¹Dxel guzuloj ree bën Israel caneguijdx reeman Jesús, guial rëbaman: “Naj naj guiadxtil ni biguiajt diizd xanyabaa.” ⁴²Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

⁴³Dxel rëb Jesús:

—Gol bacwëëz rnieeguijdxidi naj loj lasa'di. ⁴⁴Dios naj bën guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj.

⁴⁵Loj ree libr ni bacaa ree bën badëë xtiidx Dios loj ree bejn, rëb: “Dios guluü gra ree bejn.” Zeel gra ree bën rucaagdiajg xtiidxaman, rusiid tëë reeman ni ruluüman laa reeman, laa reeman zëed lon.

⁴⁶Achutdzi waguiaa da Dadan Dios, tijbzi bën guxhaalaman loj guidxliuj ma baguiaa laaman.

⁴⁷Diidxiczi rnin, bën rliiladx naj rajpaman guialnaban tiblayaa con Dios. ⁴⁸Naj naj guiadxtil ni runee guialnaban. ⁴⁹Xbéngulalidi gudaw mana loj yujbidx, per ni'czi zian güjt gajc reeman. ⁵⁰Per naj canin lojdi xcwent guiadxtil za xanyabaa, bën gaw laan gapaman guialnaban tiblayaa con Dios. ⁵¹Naj naj guiadxtil naban ni biyajb diizd xanyabaa. Bén gaw guiadxtil guie zajpaman guialnaban tiblayaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

⁵²Dxel guzuloj ree bën Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejman, ad zajptidi guialnaban. ⁵⁴Per bën gaw da cuerpan guië' tëëman da rejnan, zajpaman guialnaban tiblayaa con Dios, abi' naj yasban laaman chi nit guidxliuj. ⁵⁵Din da cuerpan naj

quijb guialraw, guiáad da rejnan naj quijb ni guië' bejn. ⁵⁶Abi' bén raw da cuerpan rë' tēeman da rejnan, laaman nabannë naj, guiáad naj nabannë' laaman. ⁵⁷Da Dadan bén guxhaal naj, rajpaman guialnaban, abi' naj nabanan por laaman. Ziangajc bén gaw da cuerpan, zajpaman guialnaban tiblyaaa con Dios por naj. ⁵⁸Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guiadxtil guie zajpaman guialnaban tiblyaaa con Dios.

⁵⁹Zian balüü Jesús bejn ree lën yadoo Capernaum.

Diidx runee guialnaban tiblyaaa

⁶⁰Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya?

⁶²¿Xhieza güüendi bal guguaadi Bén guxhaal Dios yayë'paman lod guzuman goclí? ⁶³Tijbzi por xSprijt Dios rajp bejn guialnaban tiblyaaa, bejn ad zile't güün laazaman xhienin. Abi' naj por xSprijt Dios zëed ree diidx ni gunen lojdi, por ree diidx guin rajp bejn guialnaban. ⁶⁴Per lëjt yu'di ad waliladxt.

Rëb Jesús zian guial ragbeechaawaman diidx yaløj chu

ree ad riladxt laaman chu tēë yayü laaman. ⁶⁵Rëb tēeman loj reeman:

—Zeel ma rnin lojdi guial achut zile' gui't lon bal id zëedaman por da Dadan Dios.

⁶⁶Diizd nadxel, zien ree bén zinal Jesús guro'nladx laaman, abi' ad guzanëtri reeman laaman. ⁶⁷Dxel rëb Jesús loj guidxiptio'p ree xbejnman:

—¿Në lëjt rën yaguiay ya?

⁶⁸Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë guialnaban tiblyaaa con Dios. ⁶⁹Dunujn ma baliduladx rayagbee tēen guial lüj naj Cristo, Xi'n Dios naban.

⁷⁰Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹Rëb Jesús zian por Judas Iscariote, xi'n Simón, din Judas guin naj bén bayü laaman, majsi tijb gajc xbejnman najman.

Ad riladxt ree bijch Jesús laaman

7 Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguiil ree bén Judea guin laaman din gugüjt reeman laaman. ²Per guial ma zidyob lanij ni rüjn ree bén Israel, chi rbej reeman lën ranch, ³rëb ree bijch Jesús lojman: —Brii, wej niz Judea, din në ree xbejnl Bén riga' ree niz ni guguaiaa milagr rüjnl. ⁴Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵Gunee ree bijch Jesús zian, guial ni'qui laa reeman ad riladxt laaman. ⁶Dxel rëb Jesús loj reeman:

—Ad wadxint da horan, per par lëjt xhietëez horan naj zagdx. ⁷Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. ⁸Gol wej lanij guin, sa'n naj ad zazaagajtan, din ad wadxint hor ni gazaan.

⁹Chi gulox rëbaman loj reeman zian, baya'nman Galilea.

Wej Jesús xlanij ree bën Israel

¹⁰Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee. ¹¹Per yu' ree bën Israel raguiil laaman loj lanij guin, rëb reeman:

—¿Con bën guin ya'n?

¹²Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³Per achutctzi ruza't laaman loj gra bejn, guial rdxeb reeman guxtis Israel ree.

¹⁴Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. ¹⁵Guiáad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiidtix?

^{16,17}Dxel rëb Jesús loj reeman:

—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya. ¹⁸Bën rulüü ganaxzi ni

rbëëguijcaman, rüjnman laan din guilies ree bejn xvaloraman.

Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

¹⁹Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰Badxi' ree bën guinan, rëb reeman:

—Xindxab yu' luxdool. ¿Chuczzi rën gugüjt lüj?

²¹Abi' rëb Jesús loj reeman:

—Por tijbzi milagr ni benan radxalojdi. ²²Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. ²³Yan, bal chitëe gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn?

²⁴Ad rüjnndi xgabmal por ni ruguiaazidi rüjn bejn, yaloj xgaj gol gogbee zagdx xhie cayüjnman.

Rëb Jesús ban zaman

²⁵Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguuil reeman ya din gugüjt reeman laaman? ²⁶Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo?

²⁷Per dunuj ree rayagbeechaaw

ban zaman, guiáad chi gui't Cristo, achut gagbee ban saman.

²⁸Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeman rejs rëbaman:

—iLëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. ²⁹Per naj nünbee laaman guial zialan diizd lod za'man, laa tëëman guxhaal naj.

³⁰Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman.

³¹Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³²Biguiejn ree bënfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús. ³³Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj.

³⁴Yaguilidi naj, per ad zadxejltidi naj, din ad zile't gui'tidi lod gazun.

³⁵Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bën guin din ad zadxejltaman? ¿Ni zejman lod zojb ree bën Israel loj ree benzit ya, chiglüüman laa reeman në ree bën ad najt bën Israel? ³⁶¿Xhie

rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷Dxej rliox lanij guin naj mazri dxej zojbloj, dxejzii guzuli Jesús guneeman rejs, rëbaman:

—Bal chu lëjt re'c nijs, gol guda lon din guië'dan. ³⁸Din bën rililadx naj zi'c ca loj xtiidx Dios, lën luxdooman gach nijs runee guialnaban.

³⁹Chi guneé Jesús zian, rën guiëb xtiidxaman guial gra ree bën chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰Yu' ree bën no'ch loj ree benzien guin, chi bacaagdiajg reeman ni guneé Jesús, rëb reeman: —Walican, bën guin naj gui't guidgadëë xtiidx Dios loj ree bejn.

⁴¹Yu'za reeman rëb:

—Bën guin naj bën bacaabee Dios. Per yu' reeman rëb:

—Ad laataman naj Cristo, din ad niz Galileat naj griiman. ⁴²Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³Zian gojc dxel gula' lasa' reeman por Jesús. ⁴⁴Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

⁴⁵Chi bayejc ree bën rajp ro' yadoo guin lod za' ree bënfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnētidi laax?

⁴⁶Dxel rēb ree bēn rajp ro' yadoo guin:

—iAd goct wayu bēn guiniee zi'c rnieex!

⁴⁷Abi' rēb ree bēnfarisew guin:

—¿Nē lējt ma cwējb basquieex lējt ya? ⁴⁸¿Wen yu' ree dux guxtis ree, o bēnfarisew ree ma bililadx laax ya? ⁴⁹¿Nid ragbeedi ya guial zien ree bēn guin baniyt loj Dios guial ad nūnbeet reeman ley?

⁵⁰Per bēnfarisew la Nicodemo bēn bignaj Jesús tijb guxhin, rēbaman loj reeman:

⁵¹—Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yagabee ree xhie beenman.

⁵²Badxi' reeman laan rēb reeman: —¿Wen nē lūj za'nē ree bēn Galilea ya? Basiid zagdxe loj xtiidx Dios din gagbeel ad goct warii bēn rudēē xtiidx Dios loj ree bejn niz Galilea.

⁵³Dxel bare'ch reeman zia lidx lidx reeman.

Béngunaa banaaznē xinguiiaaw ren

8 Per Jesús zēman ruguia' Olivos. ²Chi bareguiaal, rsil badxinman lēn yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman. ³Abi' mextr rulüü ree ley con ree bēnfarisew bidxinnē tijb béngunaa banaaznē tijb xinguiiaaw, dxel bazuj reeman laaman galay ree bēn guin, ⁴zianz rēb reeman loj Jesús:

—Mextr, banaaz béngunaa guie loj mer hor ni yu'nēman xinguiiaaw

ren. ⁵Abi' loj ley basa'nnē Moisejs dunuj ree ca guial lasa' béngunaa guie rayal guiētaman con guiaj. ¿Laadx lūj xhie nal?

⁶Gunabdiidx reeman zian din guidoon xhie guiēbaman din gac gutedia' reeman laaman. Per con basajb lojman abi' guzulojman cucaaman luyuj con xbacwēnman. ⁷Per guial laa reeman canabdiidxzi canabdiidx reeman lojman, abi' babejliman, rēbaman loj reeman: —Chutēēz bēn ad wayūjnt dol, yaloj laaman gucaaguiaj béngunaa guie.

⁸Dxel basajb lojman stijb, basnuu bacaaman luyuj guin. ⁹Chi biguiejn reeman ni guneeman, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree bēn riga' yagaj. ¹⁰Dxel babejliman, rēbaman loj béngunaa guin:

—¿Con ree bēn bidnē lūj? ¿Ni'qui tijb reeman achut xhie been lūj ya?

¹¹Dxel rēb béngunaa guin:

—Dad, ni'qui tijbaman.

Abi' rēb Jesús:

—Ni'qui naj achet günan lūj. Baguiaj yan, ad güünril dol.

Jesús naj bajl par bénguidxliuj

¹²Dxel gunee Jesús stijb, rēbaman loj ree bēn riga' yagaj:

—Naj naj bajl rusni bénguidxliuj. Abi' bēn guzoob da diidxan, zani xquiarguiejnman xhienaag gapaman guialnaban tiblyaa con Dios, ad yu' tēēt dxej guicajy xquiarguiejnman.

¹³Abi' ree bēnfarisew rēb reeman lojman:

—Lüj gajc ruza't lüj, abi' achet lasajc xtiidxil.

¹⁴Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëë gan, sa'n lëjt ad ragbeetidi ban zialan ban tëë gan. ¹⁵Lëjt rnieedi bejn zi'ttizi naj xixgabidi, sa'n naj achut ruzatan.

¹⁶Abi' bal guzatan bejn, ganen diidxli, din ad zanetan zi'c naj da xgaban, në da Dadan bën guxhaal naj ragbee guial diidxli naj ni ganen. ¹⁷Abi' loj xleydi ca guial chi yu' tio'p bën rniee tiblojzi, diidxliqui naj ni rniee reeman.

¹⁸Yan, naj gajc naj tijb bën rniee por naj, abi' da Dadan bën guxhaal naj, naj stijb bën rniee por naj.

¹⁹Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëëtidi da Dadan, din bal nünjbeedi naj, ziangajc nünjbeedi da Dadan.

²⁰Zian gunee Jesús la'tgaj ruluüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

²¹Gunee Jesús stijb, rëbaman:

—Chi ma gan, zaguiilidi naj, per zëjtnë xtolidi, din lod gan ad zile't gui'tidi.

²²Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. ²⁴Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

²⁵Dxel gunabdiidx reeman lojman, rëb reeman:

—¿Chuza lüj?

Badxi'man laan rëbaman:

—Ma rnin lojdi diizd yaloj. ²⁶Zien ni ra'pan gulün lëjt ni ganenë' tëën lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rnieeman naj diidxli.

²⁷Per laa reeman ad gogbeet guial Diosan ruza'taman. ²⁸Zeel rëbaman loj reeman:

—Chi ma beendi zi'ttizi rëndi con Bën guxhaal Dios, dxel gagbeedi najcan, gagbee tëëdi guial achetctzi rünan por da xgabzan, naj rnie ni ma balüü da Dadan naj. ²⁹Din laaman guxhaal naj, laaman za' con naj, abi' ad yu't dxej cwëëladxaman naj, guial zianczi rünan ni rayuladxaman.

³⁰Chi rëb Jesús zian, zien ree bejn bililadx laaman.

Bën wali naj xbejn Dios

³¹Rëb Jesús loj ree bën Israel bililadx laaman:

—Bal gusnuu guzoobidi da diidxan, waliqui najdi da bejnan, ³²abi' zünjbeedi conin naj diidxli, abi' por diidxli guin zalaadi.

³³Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

³⁴Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol. ³⁵Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. ³⁶Zeel bal Xi'nman guslaa lëjt, ad najtridi zi'c bën nado'. ³⁷Ma qui ragbeen guial loj xdiaa Abraham zëëdidi, per lëjt rën gugüjt naj guial ad rayuladxtidi da diidxan. ³⁸Naj rni ni ma balüü da Dadan naj, sa'n lëjt rüjndi zi'c na xDadidi güüdi.

³⁹Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. ⁴⁰Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nüjnman zian! ⁴¹Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

⁴²Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. ⁴³Abi' ad rignia'tidi ni rnin, guial ad rëntidi gucaagdiajguidi da diidxan. ⁴⁴xDadidi naj xinxab, abi' rüjndi zi'c rënx güüdi, din diizd yaløj ruladx xinxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad guialrusquiee. ⁴⁵Per

guial naj rni lëjt ganax diidxli, ad riladxtidi naj. ⁴⁶¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad riladxtidi naj? ⁴⁷Bën naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸Dxel rëb ree bën Israel guin loj Jesús:

—Waliqui ni ranan guial xinxab yu' luxdool naj tëël bën Samaria.

⁴⁹Badxi'man laan rëbaman:

—Achut xinxab yu' luxdon, naj cuzob xtiidx da Dadan, per lëjt ganax diidxguijdx rnieedi naj.

⁵⁰Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis. ⁵¹Diidxli rnin lëjt, bën guzoob da diidxan, ad yu't dxej guiëtaman.

⁵²Dxel rëb ree bën Israel guin lojman:

—Yanri ma rayagbeeçaawan guial xinxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lüj nal: “Bën guzoob da diidxan, ad yu't dxej guiëtaman.”

⁵³¿Wen mazri lasajquíl ya guial loj dux bëngulal ree Abraham? Güjtaman, güjt tëë ree bën badëë xtiidx Dios loj ree bejn. ¿Laadx lüj chu naladxil najl?

⁵⁴Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi. ⁵⁵Lëjt

ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nēgajc naj ma naj bēn rusquiee zi'cgajc lējt. Per nünbeen laaman abi' ruzoban xtiidxaman. ⁵⁶Xbéngulalidi Abraham, babaaman guial guguaaman dxej ni guialan. Abi' chi baguaaaman dxej guin, mazri babaaman.

⁵⁷Dxel rēb ree bēn Israel guin lojman:

—Ni'qui gadil chu' tü'pchii ijz, ¿guiaad lüj ya nal baguaaal Abraham?

⁵⁸Abi' gunee Jesús rēbaman:

—Diidxli rnin lojdi, mal nabanán chi gad Abraham chu'.

⁵⁹Dxel gules reeman guiaj din nucaa reeman laan Jesús. Per laa guzēeb gajcaman galay ree bejn, abi' gudēdaman galay reeman bariiman lēn yadoo guin, laa zia gajcaman.

Rayüjn Jesús tijb xin ad ranit loj

9 Chi cadēd Jesús tiblajt, baguaaaman tijb xin ad ranit loj diizd chi golix. ²Dxel gunabdiidx ree xbejnman lojman, rēb reeman:

—Mextr, ¿chexc zeel ad ranit loj bēn guin diizd chi golaman? ¿Por xtol ree xDadaman ya, o por xtol gajcaman?

³Badxi' Jesúsán, rēbaman:

—Najman zian ad por xtoltaman ad por xtol tēēt ree xDadaman. Gojlaman zian din chi yayajcaman, guguaa ree bejn xguialrniabee narooob Dios. ⁴Yan, la'tgaj yu' tiamp, rüjn naguiejn yaguieen ree ni na bēn guxhaal naj, din ma yayaaloj

tiamp ni achetri zajc gac. ⁵Abi' la'tgaj za'n loj guidxliuj guie, naj naj bajl rusni bénguidxliuj.

⁶Chi gulox guneeman zian, guxhie' xhiejnman luyuj, abi' beennēman laan bajn, persi gudēebaman laan guiaaloj xin guin.

⁷Abi' rēbaman lojx:

—Bitiib lojl ro' tanc Siloé —Siloé rēn guiēb ni guxhaalaman.

Dxel bitiib lojx, abi' chi bayejquix, ma rani lojx. ⁸Dxel bēn zojb ree gajxh lod zojbix con ree bēn ragbee guial laax rniab carda, rēb reeman:

—¿Nid xin guinan rbej rniab carda ya?

⁹Yu' reeman rēb:

—Laaquixan.

Yu'za reeman rēb:

—Ad laatixan, rguienzix zian.

Per laax rēb:

—Najcan.

¹⁰Dxel gunabdiidx reeman lojx, rēb reeman:

—¿Xhieza naag gojc bani lojl?

¹¹Badxi'xan, rēbix:

—Bēn la Jesús been bajn, gudēebaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹²Abi' rēb reeman lojx:

—¿Conzaman yan?

Zeel rēbix:

—Ad ragbeetan.

Gunabdiidx ree bēnfarisew loj xin guin xhienaag guzuloj rani lojx

¹³Loj hor zii binē reeman xin bayajc guiaaloj guin loj ree bēnfarisew, ¹⁴din dxej been Jesús bajn persi bayüjnman guiaaloj xin guin, dxej guin raziiladx ree bejn.

¹⁵Dxel gunabdiidx ree bénfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶Yu' ree bénfarisew guin rëb: —Bén bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. ¹⁷Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bén bayüjn guiaalojl?

Badxi'xan rëbix:

—Naj rni guial laaman naj Bén rudëë xtiidx Dios loj ree bejn.

¹⁸Per Bén Israel guin ree ad rliiladxt reeman, din ad banit lojx abi' yan ma ranin, dxel gurejdx reeman xdadix con xniaax, ¹⁹abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlíx? Yan, ¿xhienaag gojc zeel ma ruguiaax?

²⁰Badxi' reeman laan rëb reeman:

—Dunujn rayagbee guial du xi'nanan, rayagbee tëën guial diizd chi golix ad ranit lojx. ²¹Per ad rayagbeetan xhienaag gojc zeel rani lojx, ad rayagbee tëtän chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²²Rëb ree xdadix zian guial rdxeb reeman xguxtis ree Bén Israel, din ma baya'n reeman diidx, chutëëz Bén guiëb guial Jesús naj Cristo, ad zatiëjbtri reeman chu'man lën

yadoo. ²³Zianan zeel rëb reeman: “Gol gunabdiidx lojx, ma najx xingol.”

²⁴Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj Bén bayüjn lüj.

²⁵Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

²⁶Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷Badxi'xan rëbix:

—Ma rnin lojdi, abi' lëjt ad rliiladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan.

²⁹Din dunujn rayagbee Dios gunee Moisejs, per Bén guin ni'quid rayagbeetan ban zaman.

³⁰Badxi'xan rëbix:

—iXhiechalnin zeel ad ragbeetidi ban zaman! Guiáad naj por laaman ma rani lon. ³¹Dunuj ree rayagbee chaaw guial ad ridxga't Dios xtiidx ree bëndol, ridxga'man xtiidx ree Bén ruzoob xtiidxaman rüjn tëë reeman zi'c rënman. ³²Ad goct wacaagdiajg ree guial chu' Bén yayüjn loj Bén ad ranit loj diizd gojlaman. ³³Yan, bal id por Dios zëëd Bén guin, achetczi nile' nünjman.

³⁴Dxel rëb reeman lojx:

—Lüj gojl con dol, ¿wed lüj gulüü dunujn?

Abi' babëë reeman laax yagaj.

Bililadx xin bayajc guin Jesús

³⁵Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bën guxhaal Dios loj guidxliuj ya?

³⁶Badxi'xan rëbix:

—Dad, guna chunin, din chililadxan laaman.

³⁷Dxel rëbaman lojx:

—Ma baguiaal laaman, laaman naj bën caneenël.

³⁸Abi' bazuxib xin guin lojman, rëbix:

—Rliladxan lüj, Dad.

³⁹Zianz rëb Jesús:

—Bialan loj guidxliuj guie din günan guialguxtis, din por naj yani loj ree bën ad ranit loj, guiáad ree bën rani loj, ad zanit loj reeman.

⁴⁰Yu' ree bënfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

⁴¹Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

Bën rniaj xiil

10 Rëb tëë Jesús:
—Diidxliczi rnin lojdi, bën ad rut niz ro' xgurajl ree xiil, bën ru niz lood ren, laaman naj bëngubaan. ²Per bën ru niz ro' xgurajl reeb, laaman naj bën rniaj laa reeb. ³Abi' rxhial bën rajp ro' xgurajl reeb persi ru bën rniaj laa

reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin.

⁴Abi' chi ma brii gra reeb, dxel rniedaman loj reeb, guiáad laa reeb rnal laaman, guial nünbee reeb cha'man. ⁵Per ad rnalt reeb tijb bën ad nünbeet reeb, ruxüünl reeb lojman, guial ad nünbeet reeb cha'man.

⁶Chi gulox gunee Jesús zian, ad bignia't ree bën riga' yagaj xhie rën guiëb ni guneeman.

Jesús naj zi'c bën rniaj xiil ree zagdxe

⁷Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸Gra ree bën bi't chi gad naj guial naj reeman zi'c bëngubaan, rban reeman rusagzi tëë reeman. Per ree bën naj da bejnan ad bidxga't reeman laa reeman. ⁹Naj naj ro' port, abi' bën ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

¹⁰Bëngubaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan. ¹¹Naj naj zi'c tijb bën rniaj xiil ree zagdxe. Abi' bën rniaj xiil ree zagdxe xt xguialnabanman rudëëman por laa reeb. ¹²Per bën rniaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bën rniaj ree xiil, dxel rniaaz cuyojt guin laa reeb abi' rtie'chib laa reeb.

¹³Laaman rbëeladx laa reeb, din por miliazi rniajman laa reeb abi' achet naladxaman por laa reeb.

^{14,15}Naj naj zi'c bën rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanan gudëdan por laa reeb. ¹⁶Ra'p tëen stibcwaaw ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaaw reeb gac reeb tijbzi, abi' tijbzi bejn gap laa reeb.

¹⁷Da Dadan Dios rënman naj guial naj gajc rudë naj guiëtan par yabanan stijb. ¹⁸Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

¹⁹Chi biguiejn ree bën Israel guin ni rëbaman, gojc reeman tio'p lala' stijb. ²⁰Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tëë guijcaman.

²¹Per yu' reeman rëb:

—Ni'qui tijb bën yu' xindxab luxdoo ad rnieet zian. ¿Wen zajc yaxhal xindxab guiaalaj ree bën ad ranit loj ya?

Jesús con xDadaman Dios naj reeman tijbzi

²²Tiamp nayaag, chi cayüjn ree bën Israel lanij ni rüjn reeman gazobijz par yadooro' Jerusalén.

²³Wej Jesús lën yadoo guin. Chi cazaman niz ro' curdur ni rniee reeman xcurdur Salomón. ²⁴Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵Badxi' Jesúsán rëbaman:

—Ma rnin lojdi, per lëjt ad riladxtidi naj. Abi' ree ni rünan con xguialrniabee da Dadan Dios, laa reen rülüü chu najn. ²⁶Per ad riladxtidi, guial ad najtidi da bejnan. ²⁷Bën naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. ²⁸Naj rudë guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon. ²⁹Din da Dadan, bën banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. ³⁰Da Dadan con naj, nayajcan tijbzi.

³¹Dxel cwa' ree bën Israel guin guiaj din gucaaguiaj reeman Jesús.

³²Per rëbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguiajdi naj?

³³Badxi' reeman laan rëb reeman:

—Ad por ree ni zagdxe ni beentilan yacaaguiajn lüj, yacaaguiajn lüj guial ad rajptil Dios respejt, din bénguidxliujzi lüj, abi' rüjn lüj gajc zi'c Dios.

³⁴Dxel rëb Jesús:

—Loj xleydi rëb: “Naj rni guial lëjt naj dios.” ³⁵Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëläj dios bën basa'nnë ree xtiidxaman, bën gojp ree guialrniabee loj ree bën Israel. ³⁶Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel

nadi ad ra'ptan laaman respejt guial rnin, xi'nman naj? ³⁷Bal id cayünan zi'c na da Dadan, ad chililadxidi naj. ³⁸Per bal cayünan zi'c naman, majsi ad zaliladxtidi naj, per gol bililadx guial por laaman zëed ni rünan din gagbeedi guial da Dadan za'në naj, guiáad naj za'në'n laaman.

³⁹Dxel guyën reeman niniaaz reeman Jesús, per gulaaman loj reeman.

⁴⁰Abi' zëman zatiblad ro' guiiw Jordán, lod baroobnijs Waj bejn ree yaloj, yagaj baya'nman. ⁴¹Abi' zien ree bën bidxin yagaj rëb:

—Walin, majsi achet milagr been Waj, per gra ni guneeman xcwent bën guie naj diidxli.

⁴²Dád zien reeman bililadx Jesús yagaj.

Güjt Lazr

11 Guyu tijb bënragxuu, brii lajman Lazr. Laaman con re bizanman Li con Mart, naj ladx reeman Betania. ²Abi' Li bizan Lazr, laam baroob perfum guia' Jesús abi' bacwiidximin con guidxguijquim. ³Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

⁴Chi biguiejn Jesús zian, rëbaman: —Guialguijdx guin ad zëedtan par gugüjtan, zëedan din gac guguiaa bejn xguialrniabee Dios në par guguiaa reeman xguialrniabee Xi'n Dios.

⁵Majsi rën da't Jesús Mart con Li në Lazr, ⁶per chi cwa'man ruson ragxuu Lazr, sta goglaaman zatio'p dxej lod za'man. ⁷Dxel rëbaman loj ree xbejnman:

—Yo' ree niz Judea zatijb.

⁸Abi' rëb reeman lojman:

—Mextr, ad wayajct xchej guyën ree bën zojb niz ni nucaaguiaj reeman lüj. ¿Abi' chel ni zatijb ya?

⁹Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. ¹⁰Per bën rza guxhin, yu' ni rirejl guia'man, din achet bajl guin rajpaman.

¹¹Rëb tëe Jesús loj reeman:

—Ma naga'yëjs dux miw ree Lazr, per chicwëënan laax.

¹²Dxel rëb ree xbejnman:

—Dad, bal naayëjsix, rën guiëban yayajquix.

¹³Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. ¹⁴Dxel bagojn Jesús laa reeman, rëbaman:

—Ma güjt Lazr. ¹⁵Rabaan por lëjt guial ad guzutan ni din chililadxidi naj. Yan, yo' ree yugnaj reex.

¹⁶Dxel Tumajs, bën rniee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bën rusban bejn runee tëëman guialnaban

¹⁷Chi bidxin Jesús Betania, ma gojc tajp dxej biguie'ch Lazr.

¹⁸Betania guin raya'nán gajxh Jerusalén, zi'ct choon kilometro.

¹⁹Abi' zien ree bën Israel bignaj Mart con Li din yagu' reeman luxdoo reem guial güjt bizan reem.

²⁰Chi gogbee Mart ma zëed Jesús gajxh, briim bigchaaglojm laaman,

guiáad Li baya'nm lëñü. ²¹Dxel rëb Mart loj Jesús:

—Dad, bal nizujl guie, ad ziant niëjt da zanan. ²²Per naj ragbee guial ni'qui yan zunee Dios ni guiniabil lojman.

²³Dxel rëb Jesús:

—Naj rni yaban bizanl.

²⁴Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

²⁵Abi' rëb Jesús:

—Naj naj bën rusban ree bengüt rudë tëen guialnaban loj ree bejn. Bén chililadx naj, majsi guiëtaman, per zajpaman guialnaban loj Dios.

²⁶Guiáad gra bën naban rililadx tëe naj, zajpaman guialnaban loj Dios. ¿Rililadxil ni canin lüj ya?

²⁷Dxel rëbim lojman:

—Rililadxanan Dad. Rililadxan lüj naj Cristo, Xi'n Dios, bën naj gui't loj guidxliuj.

Biin Jesús ro' xbaa Lazr

²⁸Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹Biguiejnzi Li zian, laa bisugajquim bigchaaglojm Jesús.

³⁰Abi' Jesús gadzaman chu' luguiedx guin, sta za'man lod bigchaagloj Mart laaman. ³¹Guiáad ree bën Israel zojbnë Li ragu' reeman luxdoom, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

³²Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³Chi baguiaaman roon Li con ree bën Israel nal laam, dád gognaa luxdooman guyu naya tëëman.

³⁴Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguiaal.

³⁵Dxel biinman. ³⁶Abi' rëb ree bën Israel guin:

—Gol baguiaa nial dád guyënman laax.

³⁷Per yu' reeman rëb:

—Bën guinan baxhal guiaaloj tijb bën ad ranit loj. Yan, ¿niche niäjc nünjman ya'n chitëë niëjt Lazr?

Basban Jesús Lazr

³⁸Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbilíaa, nada'cw tijb guiaj ro'n. ³⁹Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰Badxi' Jesúsán rëbaman:

—¿Nid rnin ya, bal rililadxil, guguiaal xguialrniabee Dios?

⁴¹Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin.

⁴²Naj ragbeecheaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

⁴³Chi gulox rëbaman zian, dxel guridxa'man rëbaman:

—iLazr, barri yagaj!

⁴⁴Dxel barri Lazr lën baa guin nalüüb vend yaax con guia'x,

guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguiajx.

**Baya'n reeman diidx xhienaag
guiniaaz Jesús**

(Mt. 26:1-5; Mr. 14:1-2; Lc. 22:1-2)

⁴⁵Dád zien ree bën binal Li bililadx Jesús, guial baguiaa reeman milagr beenman. ⁴⁶Per yu' reeman bicojn bénfarisew ree ni been Jesús. ⁴⁷Dxel bénfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayün xin guin? ⁴⁸Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

⁴⁹Per loj reeman yu' bën la Caifás, bixhioz zobjloj rniabee loj ijzsii, rëbaman loj reeman:

—¿Nid ragbeedi ya, ⁵⁰nid rignia' tëedi ya, zagdxë naj guiët tijbzi bejn por gra bën Israel, luar nit dux nacion ree?

⁵¹Per Caifás guin ad ni naladxtzaman rëbaman. Guial najman bixhioz zobjloj rniabee loj ijzsii, zeel badëed Dios ni guneeman, guial guiët Jesús por gra ree bën Israel. ⁵²Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. ⁵³Zeel diidx dxejzii baya'n reeman diidx gugüjt reeman Jesús.

⁵⁴Zianan zeel ad contzi rulüülojtraman loj ree bën Israel, bazaman yagaj ziaman guiedx la

Efraín, najn gajxh yujbidx, yagaj guzunë ree xbejnman.

⁵⁵Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal.

⁵⁶Dxel raguiil reeman Jesús, abi' rniabdiidx loj lasa' reeman lën yadooro' Jerusalén, rëb reeman: —¿Xhie nadi? ¿Zi'taman lanij ya o ad zi'ttaman?

⁵⁷Bénfarisew ree con ree bixhioz rniabee, gunabee reeman bal chutëez bën ragbee ban za' Jesús, gugojnman din chile' guiniaaz reeman laaman.

Baroob Li perfum guia' Jesús

(Mt. 26:6-13; Mr. 14:3-9)

12 Za xho'p dxej riaadx gal pascw, chi we Jesús Betania, lod zobj Lazr, xin basbanman. ²Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. ³Dxel cwa' Li cost garol lijtr perfum ni lasajc wayëjx, najcchaawnën ganax nardo, baroobimin guia' Jesús abi' bacwiidxnë guidxguijquimin. Guidibczi lënu guin baree nejxh. ⁴Dxel Judas Iscariote, xin naj tijb ree xbejn Jesús, xin bayü laaman, rëbix:

⁵—¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bënprob ree.

⁶Ad guial yu'tix xgab bënprob guin ree zeel rëbix zian, rëbix zian guial

najx xin gubaan. Abi' guial laax naaz bols yu' milia, rbanx ni rudëe reeman rgu'chaawix. ⁷Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. ⁸Din bënprob guin ree zianczi za'në reeman lëjt, per naj ad ziantczi gazunë'n lëjt.

**Baya'n reeman diidx
gugüjt reeman Lazr**

⁹Bén guixiuj bën Israel gogbee za' Jesús Betania, abi' wej reeman yagaj, ad par guguaatzi reeman Jesús, në par guguaa reeman Lazr, xin basbanman. ¹⁰Zeel baya'n ree bixhioz rniabee diidx guial në Lazr gugüjt reeman. ¹¹Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹²Chi bareguiaal, zien da't ree bën zë lanij pascw Jerusalén gogbee guidxin Jesús yagaj, ¹³dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—iBenza'c bendxoon naj Dios!
iNüjnle'man Bén guxhaalaman!
iNüjnle'man bën naj rey Israel!

¹⁴Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵Bén Sión, ad rdxebidi.

Gol baguiaa, laa xreydi zëed,
dxiiibaman tijb burdoo.

¹⁶Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷Bén guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman diidx loj ree bejn ni baguiaa reeman. ¹⁸Zeel zien ree bejn brii bigchaagloj laaman, guial gogbee reeman milagr beenman.

¹⁹Dxel rëb loj lasa' ree bënfarisew:
—Gol baguiaa nial graczi bejn zinal laax, achetri zajc yaguieen ree.

Yu' ree bën grieg raguiil Jesús

²⁰Loj gra ree bën we lanij bignajchi' reeman Dios Jerusalén, no'ch bëlzi ree bën grieg, ²¹gubig reeman loj Felip, bën za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²²Abi' wej Felip biguiedxaman loj Andrejs, dxel wej grop reeman bicojn reeman Jesús. ²³Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman.

²⁴Diidxliczi rnin, zi'c tijb xob bal idan chu' luyuj najx najx tijbzi, per bal chu'n luyuj zajcxhiejn. ²⁵Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bën ru mazri xgab güünman zi'c rën Dios, xhietëëz sacaman, zajpaman guialnaban tiblayaa con laaman. ²⁶Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

Rugojn Jesús guial guiëtaman

²⁷Rëb tëë Jesús:

—Dád yu'n xgab. ¿Xhie guiën?
¿Zën ya: “Dad, babëë naj loj ni

gazaagdiajn”? Per ad zëtan zian, din par zian zialan. ²⁸Dad, balüü xgualrniabeel.

Dxel biguien cha' bejn xanyabaa rëbaman:

—iMa balü da gualrniabeen, per gulünan stijb!

²⁹Riguiejn ree bën riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gune laaman.

³⁰Dxel rëb Jesús:

—Ad por najtan biguien cha' bejn, por lëjtan. ³¹Ma bidxin dxej gac gualguxtis loj guidxliuj, yan yarii bën rniabee lojn. ³²Per chi guilies reeman naj ya loj guidxliuj guie, dxel gui't graloj bejn lon.

³³Zian basignia'man xhienaag guiëtaman. ³⁴Badxi' ree bën guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

³⁵Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bën rza loj xcay, ad ragbeetaman ban cheman. ³⁶Gol bililadx bajl guie, la'tgaj za'nëdan, din gaquidi xbejnan.

Chi gulox gune Jesús zian, dxel baquie'chlojman loj reeman.

Ad bililadxt ree bejn Jesús

³⁷Majsi been Jesús zien da't milagr baguiaa reeman, ad bililadxt reeman. ³⁸Zian gojc cumplid ni bacaa Isaías bën badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xgualrniabeeman?

³⁹Zianan zeel ad gojct nililadx reeman, din në ze bacaa Isaías:

⁴⁰Dios basiaaw guiaal loj reeman, bascajy tëëman xquiarguiejn reeman,

chitëë guguaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

⁴¹Rëb Isaías zian guial baguiaaman xbiani Jesús, zeel baza'taman laaman.

⁴²Per ni'czi zian, dád zien ree bën zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bënfarisew laa reeman lod ricaagdiajg reeman xtiidx Dios, ⁴³din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴Gune Jesús rejs rëbaman:

—Bën rililadx naj, ad najtzan rililadxaman, në da Dadan bën guxhaal naj. ⁴⁵Bën ruguiaa naj, në bën guxhaal naj ruguiaaman. ⁴⁶Naj naj bajl, bialan loj guidxliuj guie, chitëë yaya'n ree bën rililadx naj loj xcay. ⁴⁷Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol. ⁴⁸Bën ad rënt naj ad rucaagdiajg tëëtaman da diidxan, mal yu' ni gudëëd laaman casti: diidx ni rën, laan gudëëd laaman casti chi guidxin dxej. ⁴⁹Din ad ni rbëguictan rnien. Da

Dadan, Bén guxhaal naj rniabee ni ganen ni gulü tēen, ⁵⁰zeel ragbeen, ni rniabee da Dadan runee guialnaban tiblayaa. Zianan zeel ni rnin rulünan zi'c rniabeeman.

Gudiib Jesús guia' ree xbejnman

13 Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguiaj loj xDadaman. Zianczi guyēn ree xbejnman, bén riga' ree loj guidxliuj, rēnman laa reeman goctēēz. ²⁻⁴Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rijnx xgab yayüx Jesús loj ree bén gugüjt laaman. Ragbee Jesús guial badēēd xDadaman gra guialrniabee lojman, laa tēēman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulēēman tijb lajd najcwaman luya, dxel cwa'man tijb tuay guxhii xizaman. ⁵Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēēman laan con tuay naxii xizaman. ⁶Chi bayal quiibaman guia' Simón, bén rniece reeman Bēd, rēbaman loj Jesús:

—Dad, ðluj quiib guia'n ya?

⁷Badxi'man laan rēbaman:

—Ad rignia'til ni cayünan yan, per qui chignia'rilan.

⁸Zeel rēb Bēd lojman:

—Ad zatiēēbtan quiibil guia'n.

Abi' rēb Jesús:

—Bal id zaguiiban guia'l, ad zile'tri gaquil da bejnan.

⁹Zeel rēb Bēd lojman:

—Dad, ad bal guia'zan quiibil, gudiib nē yan con guican.

¹⁰Badxi'man laan rēbaman:

Bén goznejz guia'zaman riaadx chēd, din guidibaman naya. Abi' lējt ma nayadi, majsi ad gratidi.

¹¹Ma ragbeeman chu yayü laaman, zeel rēbaman: “Ad gratidi naya.”

¹²Chi gulox gudiibaman guia' reeman, bayajcw xabaman, gurejman xan mex guin zatijb, dxel rēbaman:

—¿Bignia'di ni benan ya?

¹³Rnieedi naj Mextr nē Dad, waliquidi najn. ¹⁴Bal najn Mextr nē Dad, gudiiban guia'di, ziangajc quiib guia' lasa'di. ¹⁵Ma balün lējt, din güüнди zi'c benan. ¹⁶Diidxliczi ganin, achut mojs naj mazri guial loj bén rniabee laaman, achut bén ri't naj mazri guial loj bén rxhiaal laaman. ¹⁷Bal rignia'di nine güün tēēdan, yabaanē Dios lējt.

¹⁸Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rēban: “Bén rawnē'n tijbzi, bayejcaman contr naj.” ¹⁹Ma rugojnan lējt din gagbeedi chi gac zian, din chililadxidi chu najn. ²⁰Diidxliczi ganin, bén rucaagdiajg ni rēb bén rxhialan, najn rucaagdiajgaman, guiáad bén rucaagdiajg da diidxan, xtiidx bén guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹Chi gulox gunees Jesús zian, dád guyunayaman, dxel rēbaman loj reeman zagdx:

—Diidxliczi ganin, tijb lëjt yayü naj loj ree bén gugüjt naj.

²²Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³Tijb bén guyën da'taman zojb cwë'man, hor zii chi cayaw reeman xche, ²⁴dxel been Bëd sen lojman din guiniabdiidxaman chunin ruza't Jesús. ²⁵Zeel mazri gubigaman cwë' Jesús gunabdiidxaman, rëbaman:

—Dad, ¿chunin?

²⁶Badxi' Jesúsán rëbaman:

—Gugajdxan ta'n guidxtil, din loj xin gudëdanan, laaxan yayü naj.

Dxel bagajdxaman ta'n guidxtil badëëman laan loj Judas, xi'n Simón Iscariote. ²⁷Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸Per achutczi ree bén zojb xan mex guin bignia' chexc zeel rëbaman zian. ²⁹Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree bén rzagdiaj ya. ³⁰Chi ma gudawix guidxtil guin, dxel briix, ma guxhin.

Gunabee Jesús tijb nicüb

³¹Chi ma brii Judas, rëb Jesús loj ree xbejnman:

—Yan guien xguialrniabee Bén guxhaal Dios din gagbee ree bejn xhienaag naj guialrniabee gudëë Dios lojman. ³²Din bal gulüü Bén guxhaal Dios xguialrniabee Dios, ziangajc gulüü Dios xguialrniabeeman, zeel ma gudëëdaman laan. ³³Xi'n, ad zien dxejtri gazunë'n lëjt, yaguilidi

naj, per zi'cgajc rën loj ree bejn, ziangajc ganin lojdi yan: Ad zajct chedi lod gan. ³⁴Ganin tijb nicüb ganabeen: Gol guyën lasa'di zi'c rënan lëjt. ³⁵Bal guiën lasa'di, zian gagbee gra bejn guial najdi da bejnan.

Guiëb Bëd ad nünbeetaman Jesús
(Mt. 26:31-35; Mr. 14:27-31; Lc. 22:31-34)

³⁶Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷Zeel rëb Bëd:

—Dad, ¿chexc zeel ad zajct guidaalan lüj yan? Xt zajc guiëtan por lüj.

³⁸Badxi' Jesúsán rëbaman:

—¿Walil ya rënl guiëtil por naj?

Diidxliczi ganin, chi gad guid cwidxa', mal rëbil choon volt, ad nünbeetil naj.

Jesús naj nejz guidxinnë bejn loj Dios

14 Rëb tëë Jesús:

—Ad rudi xgab. Gol bililadx Dios, gol bililadx tëë naj. ²Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³Chi ma benchaawan luar guin, dxel yaguialan guidgaxin lëjt din sudi lod gazun. ⁴Ma nünbeedi nejz zë lod gan.

⁵Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶Badxi'man laan rëbaman:

—Naj naj nejz, najn diidxli, naj tēen guialnaban. Tijbzi naj zajc chinē' bejn ree loj da Dadan. ⁷Bal nünbeedi naj, nē da Dadan giünbeedi. Per ma nünbeedi laaman diizd yan, din ma baguiaadi laaman.

⁸Dxel rēb Felip:

—Dad, banee mod majsi yaguaazan bēn naj xDadil.

⁹Badxi'man laan rēbaman:

—Felip, ma gojc xchej za'nē'n lējt. ¿Nid wayünbeel naj ya? Din bēn ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? ¹⁰¿Nid rliiladxil ya, naj za'nē' da Dadan, guiáad laaman za'nē' naj? Ni rnin lojdi, ad rbēguictanan. Da Dadan, bēn nabannē'n, laaman rüjn dxiin guin. ¹¹Gol bililadx naj za'nē' da Dadan, guiáad laaman za'nē' naj. Balgui majsi ni rünzan gol bililadx. ¹²Diidxliczi ganin: Bēn rliiladx naj, nēgajcaman giün ni rünan, giünman ni mazri narooob, din naj yaya' lod za' da Dadan. ¹³Graczi ni guiniabidi lojman por naj, gūnanan dīn gulūn xguialrniabeeman. ¹⁴Gūnan xhietēez ni guiniabidi.

Guixhiaal Jesús xSprijtaman

¹⁵Bal rēndi naj, gucaagdiajguidi ni balūn. ¹⁶Din guiē loj da Dadan guixhiaalaman Sprijt sunē lējt, ¹⁷Sprijt gulūü diidxli, dīn zianczi sunēman lējt. Bēn ad rliiladxt ree Dios ad zajct tia' reeman Sprijt guin, dīn ad ruguiaat reeman ad nünbee tēet reeman laaman. Per lējt nünbee laaman, dīn sunēman lējt yaya'n tēēman luxdoodi tiblyaa. ¹⁸Ad zusa'ntan xtijbidi, yaguaialan

stijb guidganan lējt. ¹⁹Sta'nz riaadx ad zuguiatri ree bēnguidxliuj naj, per lējt guguijadi naj, guibandi dīn nabanana. ²⁰Dxej zii ree, gagbeedi za'nē' da Dadan, lējt za'nē' naj, guiáad naj za'nē'n lējt zianczi.

²¹Bēn rucaagdiajg ni rniabeen rüjn tēēman laan, walicaman rēnman naj. Guiēn da Dadan bēn rēn naj, nē naj guiēn laaman dīn giünbeeman naj.

²²Gunabdiidx Judas (ad bēn bayüt Jesús) rēbaman:

—Dad, ¿chexc zeel dunujzan yayagbee chu lūj, guiáad ree bēnguidxliuj ad zagbeet reeman?

²³Badxi' Jesúsana rēbaman:

—Bēn guiēn naj guzoobaman da diidxan, guiēn da Dadan laaman, guiáad naj guidnē' da Dadan dīn yabajnnē'n laaman. ²⁴Bēn ad zēnt naj ad zuzoobtaman da diidxan, dīn diidx cucaagdiajguidi yan ad da diidxtanana, xtiidx da Dadanan bēn guxhaal naj.

²⁵'Canin lojdi gra nine, la'tgaj za'nē'n lējt. ²⁶Per xSprijt Dios, bēn sunē lējt zianczi, bēn guixhiaal da Dadan por naj, graczi gulūūman lējt dīn gusaaladxidi ni canin.

²⁷'Chi yaya'n, yabecdēn luxdoodi, gunen guialnaza'c lojdi, ad zi'c runeet ree bēnguidxliujn, ad bal ru nayadi ad rdxeb tēēdi. ²⁸Ma rnin lojdi, yaya'n, dxel yaguaialan zatijb. Bal walidi rēndi naj, chu' luxdoodi zagdxē, guial gagbeedi yaya' loj da Dadan, dīn mazri zojblojman guial lon. ²⁹Ma rugojnan lējt, dīn chi gac zian, chililadxidi.

³⁰'Ad zro'tri ganenē'n lējt, dīn ma zēed xin rniabee guidxliuj, majsi ad

nët naj rniabeex. ³¹Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

Rën Jesús yadxu'në' reeman zianczi

15 Basnuu rëb Jesús:
—Naj naj zi'c yag rtia ni nejxh zagdxé, guiáad da Dadan naj zi'c bën rxübin laan. ²Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiamaan laa reen din tia reen mazri. ³Lëjt ma nayadi, guial basia diidx rnin lëjt. ⁴Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüindi ni rën Dios bal id za'nëdi naj.

⁵Naj naj zi'c yag rtia ni nejxh, guiáad lëjt naj zi'c xidxan. Bën sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüindi. ⁶Bën ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

⁷—Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan. ⁸Bal güüindi ni rën da Dadan, gaquidi quijb da bejnman, din guza't ree bejn laaman zagdxé. ⁹Rënan lëjt zi'c rën da Dadan naj, gol basaaladx rënan lëjt. ¹⁰Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

¹¹Rnin lojdi zian dín chu' luxdoodi zagdxé zi'c yu' luxdon zagdxé, zagdxé da't chu' luxdoodi.

¹²Gol guyën lasa'di zi'c rënan lëjt, laan rniabeen güüindi. ¹³Achut rën xmiw mazri guial loj bën rëjt por laa reeman. ¹⁴Lëjt naj da miwan bal güüindi ni rënan. ¹⁵Ad zanetran lëjt mojs, din mojs ad ragbeetaman xhie rüjn bën rniabee laaman. Ganen lëjt miw, din balün lëjt graczi ni na da Dadan lon. ¹⁶Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. ¹⁷Rniabeen: Guiën lasa'di.

Ralen ree bejn Jesús
con ree xbejnman

¹⁸Rëb tëë Jesús:

—Bal ralen ree bénguidxliuj lëjt, gol basaaladx, yalój naj balen reeman. ¹⁹Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. ²⁰Gol basaaladx ni rnin: “Achut mojs naj mazri guial loj bën rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. ²¹Graczi nine güüinnë reeman lëjt por naj, dín ad nünbeet reeman bën guxhaal naj.

²²Achet xtol reeman niu, bal idan nial ninienë'n laa reeman, per yan yu' xtol reeman. ²³Bën ralen naj, nëgajc da Dadan ralenman. ²⁴Achet xtol reeman niu, bal idan nün ree ni benan loj reeman ni achutczi wayüjn, per ma baguiaa reeman laa reen, majsi zian ralen gajc reeman naj në da Dadan. ²⁵Per rajc zian dín

gac cumplid ni ca loj xley reeman, rëban: “Achet rünan ralen reeman naj.”

²⁶Per chi gui't Sprijt gaxhalan din sunëman lëjt guluü tëëman diidxli, Sprijt zëed loj da Dadan, laaman gü da diidxan. ²⁷Nëgajc lëjt gü laan, din diidz yaloj za'nëdi naj.

16 ¹Rnin zian, din ad zabëjzt chililadxidi naj. ²Yabëë reeman lëjt lod ricaagdiajg reeman xtiidx Dios, zadxin dxej, chutëëz bën gugüjt lëjt naladx reeman Dios cayüjn reeman wen. ³Güün reeman zian din ad nünbeet reeman naj ni'qui da Dadan. ⁴Per ma rnin lëjt, din chi guidxin dxej guin gusaaladxidi guial ma bagojnan lëjt.

Ni rüjn xSprijt Dios

⁵Ad rnitán lojdi zian diidz yaloj, din naj guzunë' lëjt. ⁶Per yan yaya'n loj bën guxhaal naj. Achutzidi rniabdiidx ban gan, ⁷aal yu'nayadi guial canin zian. ⁸Per diidxliczi rnin: zagdxé najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. ⁹Chi gui'taman, laaman guluü ree bénguidxliuj ni naj dol, ni naj ni zagdxé, në xguialguxtis Dios. ¹⁰Gagbee reeman yu' xtol reeman, guial ad riladxt reeman naj. ¹¹Ni zagdxé guin naj guial yaya' loj da Dadan din ad zuguaatrídi naj. ¹²Guiáad Dios ma been xguialguxtisaman con xindxab rniabee guidxliuj.

¹³Yu'ri ni rënan ganin, per dád zien gacan par lëjt. ¹⁴Chi gui't Sprijt guluü lëjt diidxli, din ad züt xtiidx gajcaman, guinieeman graczi ni guienman, laaman guluü lëjt ni gac.

¹⁵Guza'taman naj zagdxé, din naj gudëd ni guluüman lëjt. ¹⁶Graczi ni rajp da Dadan naj par naj, zeel rnin, Sprijt guin tia' ni gudëdan din guluüman laan lëjt.

Guguaiaa ree xbejn Jesús laaman zatijb

¹⁷Ma guidxin dxej ad zuguaatrídi naj, per ad zajct xchej, guguaiaadi naj stíjb.

¹⁸Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaiaa reeman stíjb, din yaguaia loj xDadaman? ¹⁹¿Chexc zeel naman: “Ad zajct xchej”? Ad rayignia't ree ni caneeman.

²⁰Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrídi naj, per ad zajct xchej, guguaiaadi naj stíjb. ¿Ni nen canabdiidxidi ya? ²¹Diidxli ganin, goondi chu' tëë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²²Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoodan zagdxé, guial ma gojl xi'nman. ²³Ziangajc lëjt cadëdidi tarbajw yan, per chi guguaian lëjt zatijb, chu' luxdoodi zagdxé, achutzí zajc yabëë laan luxdoodi.

²⁴Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj,

guneeman. ²⁴Guiáad yan achet wanabidi por naj, gol gunaban din tia'dan, din chu' luxdoodi zagdx tiblyaaa.

Yaguiaj Jesús lod guzaman

²⁵Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdx xcwent da Dadan. ²⁶Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, ²⁷din rënman lëjt, rënman lëjt guial rëndi naj rliladx tëëdi guial laaman guxhaal naj. ²⁸Briin lod za' da Dadan persi bialan loj guidxliuj guie, yan gusa'nan laan din yaya'n lojman.

²⁹Dxel rëb ree xbejnman:

—Yanri ma cusignia'l zagdx.

³⁰Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxa guxhaal Dios lüj.

³¹Badxi' Jesús laan rëbaman:

—¿Ma rliladxidi yan ya? ³²Gol gogbee, ma bidxin hor yare'chidi, tijb gajdi yaguiaj lidx, gusa'ndi da xtijban. Per ad za't da xtijban, da Dadan za'në naj. ³³Rnin gra nine din cwedi zagdx guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

Gurejdx gunab Jesús xDadaman por ree xbejnman

17 Chi gulox rëb Jesús zian loj ree xbejnman, dxel baguiaaman xanyabaa rëbaman: —Dad, ma bidxin hor, balüü da guialrniabeen din gulün

xguialrniabeel. ²Baneel guialrniabee lon din ganabeen gra bejn gudëd tëën guialnaban tiblyaaa loj gra bën baneel.

³Guiban reeman tiblyaaa bal güünbee reeman lüj, tijbzi lüj naj quijb Dios, güünbee tëë reeman najn guxhaalil.

⁴Naj bazat lüj zagdx loj guidxliuj; yan ma gulox benan ni nal. ⁵Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

⁶Rëb tëë Jesús:

—Bën gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. ⁷Yan ma gogbee reeman guial gra ni benan gra tëë ni balün naj xieenl. ⁸Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tëë reeman lüj guxhaal naj.

⁹Rbedx rniababan lüj por laa reeman, guial naj reeman xbejnl banee tëël laa reeman lon, ad rbedx rniabtan por ree bënguidxliuj.

¹⁰Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bën baneel.

¹¹'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bën naya nali, gunaj reeman con gra guialrniabee ca'l ni banee tëël lon, din gac reeman tijbzi zi'c nayajc. ¹²Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëëb, tijbzi xin ma naj

diidx bizëeb, din gac cumplid ni ca loj xtiidxil.

¹³Yan yagualan lod za'l, per canen zian la'tgaj za'n loj guidxliuj guie, din chu' luxdoo reeman zagdx, zi'c yu' luxdon zagdx.

¹⁴Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. ¹⁵Ad rniaabtan yabëel laa reeman loj guidxliuj, rënan guinial laa reeman, chitëë giün reeman ni mal. ¹⁶Ad najt reeman bénguidxliuj, zi'cgajc naj. ¹⁷Basia reeman con xtiidxil, din laan naj ni diidxli. ¹⁸Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹Por laa reeman rudëd da guialnabanan din gac reeman xbejnl diidxliczi.

²⁰Basnuu Jesús, rëbaman:

—Ad por laatzl reeman rbedx rniaaban lüj, në por ree bén chililadx chi gucaagdiajg reeman ni guinee reeman. ²¹Rniaaban lojl din guchajg lasa' reeman din yayajcnë' reeman tijbzi, Dad, zi'c za'nël naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. ²²Badëdan guialrniabee baneel loj reeman, din gac reeman tijbzi zi'c nayajc, ²³naj za'në' laa reeman, guíaad lüj za'nël naj. Zeel gac reeman tijbzi din gagbee ree bejn, lüj guxhaal naj rën tëel laa reeman zi'c rënl naj.

²⁴Dad, lüj banee laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw. ²⁵Dad, lüj rüjn guialguxtis zagdx. Ad nünbeet ree

bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. ²⁶Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëen laa reeman.

Bayü Judas Jesús

(Mt. 26:47-56; Mr. 14:43-50; Lc. 22:47-53)

18 Chi gulox gunee Jesús zian, dxel briinë ree xbejnman, zë reeman stiblad ro' guiiw la Cedrón, bidxin reeman lod yu' ree yag. ²Në Judas, xin yayü laaman, nünbee yagaj, guial zien volt binëman laa reeman ni. ³Zeel bidxinnë tibcwaa ree suldad në ree bén rajp ro' yadoo, guxhaal quijb ree bixhioz laa reeman në ree bënfarisew, ca' reeman bajl rusni ree, në ree espad con ree lans. ⁴Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguillidi?

⁵Badxi' reeman laan rëb reeman:

—Jesús bén Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman. ⁶Chi rëbaman loj reeman: “Najn”, dxel baguiadruxan reeman biajb reeman luyuj.

⁷Gunabdiidxaman zatijb rëbaman:

—¿Chu raguillidi?

Rëb reeman:

—Jesús bén Nazaret.

⁸Zeel rëbaman:

—Ma rnin, najn. Bal naj raguillidi, gol baslaa ree bén guie yaguiaj reeman.

⁹Zian gojc cumplid ni rëb loj xDadaman: “Achut ree bén baneel

lon bizëëb.” ¹⁰Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zobjloj. ¹¹Dxel rëb Jesús loj Bëd:
—Bagu'chaaw espad zii. Bal rën da Dadan gazaagdiajn zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹²Suldad guin ree con xin rniabee laa reex con ree bën rajp ro' yadoo gunaaz reeman Jesús, guxhii reeman laaman. ¹³Dxel binë reeman laaman yaløj lidx bën la Anás, din laaman naj xdadsuegr Caifás quijb bixhioz zobjloj loj ijz zii. ¹⁴Laagajcaman rëb loj gabilt, mazri zagdxë guiët tijbzi bejn por gra ree bën Israel.

Rëb Bëd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵Tio'p ree xbejn Jesús binal laaman. Tijbaman la Simón, bën rniee reeman Bëd, stijbaman naj bën nünbee quijb bixhioz zobjloj, zeel gyunëman Jesús lënu guin, ¹⁶guiáad Bëd baya'nman lule!. Zeel bariï bën nünbee bën rniabee ree bixhioz, guneenëman biin rajp ro' port guin, persi guyu Bëd lënu. ¹⁷Gunabdiidxim lojman rëbim:
—¿Nid lüjn naj tijb xbejn bën guin ya?

Badxi'man laan rëbaman:

—Ad najtan.

¹⁸Per guial dád nayaag, zeel bën naj ree mojs con ree bën rajp ro' yadoo nabe'c reeman guij rucha' reeman. Nëgajc Bëd cucha'në reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹Guzuloj bën la Anás canabdiidxaman loj Jesús xcwent ree xbejnman në xcwent ni ruliüüman. ²⁰Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadoo' ree, lod rado'p dugra ree. Achet ni gunen ralan. ²¹¿Chexc zeel rniabdiidxil lon? Gunabdiidx loj ree bën bacaagdiajg ni rën, laa reeman na xhie gunen, laa reeman ragbee.

²²Chi rëbaman zian, tijb bën rajp ro' yadoo guin wëëz ro'man, rëbaman:

—¿Zian yadxi'l xtiidx bën rniabee guin ya?

²³Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxë, ¿chexc zeel rguinl naj?

²⁴Dxel guidib naxiiman guxhaal Anás laaman loj Caifás, bën naj quijb bixhioz zobjloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bën guin ya?

Badxi' Bëd laan rëbaman:

—A'n, ad xbejntaman naj.

²⁶Dxel tijb xmojs bixhioz zobjloj guin, bën naj lasa' bën gutü' Bëd guidiajg, rëbaman loj Bëd:

—¿Nid lüjn baguian ya za'nël laaman guia' ree yag olivos?

²⁷Rëb Bëd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree bën Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. ²⁹Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰Badxi' reeman laan rëb reeman: —Bal najman benza'c, ad ziant nudnë'n laaman lojl.

³¹Dxel rëb Pilato: —Gol bignëx, gol been guialguxtis zi'c naj xleydi.

Abi' rëb reeman: —Per ad naca'tan guialrniabee yanabeen guiët bejn.

³²Zian gojc cumplid xtiidx Jesús chi bagojnman xhienaag guiëtaman. ³³Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bën Israel ya?

³⁴Badxi' Jesúsán rëbaman: —¿Lüjzci rniabdiidx lon ya o yu' ree ben ren na lojl zian?

³⁵Badxi' Pilato laan, rëbaman: —¿Wen bën Israel naj ya? Bën ladx gajc reel con ree bixhioz rniabee bidnë lüj lon. ¿Xhie beenl?

³⁶Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bën nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

³⁷Dxel rëb Pilato lojman: —¿Zë loj diidxan ya rey najl? Badxi' Jesús laan rëbaman: —Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiagj reeman ni rnien.

³⁸Dxel rëb Pilato: —¿Xhiezanan naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xguialquia xin guin radxejlan. ³⁹Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰Dxel gurixdiaj ree bën Israel guin, rëb reeman:

—iAd laataman guslaal! iZagdxeli baslaa Barrabás!

Abi'za Barrabás guin béngubaanan.

19 Dxel gunabee Pilato gudijn ree suldad Jesús. ²Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. ³Dxel gubig reeman lojman, rëbgaj reeman: —iGuibanri xrey ree bën Israel! Dxel rëëzgjaj reeman lojman.

⁴Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiax radxejlan.

⁵Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—iBacaax loj crüjz! iBacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtoliX radxejlan.

⁷Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸Chi biguienman ni rëb reeman, mazri bidxebaman. ⁹Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. ¹⁰Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

¹²Diidz hor zii gajc raguiil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—iBal guslaal laax, ad najtil xmiw bën naj César! iDin chutëëz bën rajc ree rzuj contr César!

¹³Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. ¹⁴Chi guixiez gal lanij pascw, cost garol dxej rëb Pilato loj ree bën Israel: —iLaa xreydi guie!

¹⁵Per rbidxa' reeman rëb reeman: —iGuiëtix! iGuiëtix! iBacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. ¹⁸Ni bacaa reex laaman loj crüjz con zatio'p ree bejn, tijb gaj reeman ca cwë'man. ¹⁹Gunabee Pilato cwa lejtr guije crüjz guin, rëban: “Jesús bën Nazaret, xrey ree bën Israel.” ²⁰Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. ²¹Rëb ree bixhioz rniabee ree bixhioz loj Pilato: —Ad rucaal: “Xrey ree bën Israel”, bacaa: “Bën rëb naj xrey ree bën Israel.”

²²Badxi' Pilato laan rëbaman:

—Ni ma bacan yaya'nan zian.

²³Chi gulox bacaa ree suldad guin Jesús loj crüjz, baca' reex xabaman,

gudixya' reexan tajp la', dxel cwa' reex tib la' gajn. Nē stijb xabaman cwa' reex, ad nadiibtan, najcchaaw diisd yējnan xt guia'n, najn tijbzi lajd. ²⁴Zeel rēb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rēban: “Bala' reeman da xaban, gudxijt tēē reeman suert guijcan.” Zeel been ree xinsuldad guin zian.

²⁵Gajxh cwē' crūjz ca Jesús za' xniaaman con xbēl xniaaman con Li xbéngunaa Cleofas con Li bēn gunee reeman Magdalena. ²⁶Chi baguiaa Jesús xniaaman, za' tijb ree xbejnman cwē'man, bēn rēn da'taman, rēb loj xniaaman:

—Na, laa xi'n'l yagaj.

²⁷Dxel rēb loj xbejnman:

—Laa xniaal yagaj.

Diisd dxej zii bignēman xniaa Jesús lidxaman.

Gūjt Jesús

(Mt. 27:45-56; Mr. 15:33-41; Lc. 23:44-49)

²⁸Chi gulox rēb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rēbaman:

—Re'can nijs.

²⁹Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. ³⁰Chi ma gu'man laan, dxel rēbaman:

—Ma gojc gran cumplid.

Dxel basajb lojman luyuj, gūjtaman.

Guliiz tijb suldad guiib cwē'lēn Jesús

³¹Ma cayūjn ree bēn Israel porvinid din guixiez gal lanij pascw.

Zeel ad guyēnt reeman naya'n ree cuerp guin loj crūjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bēn ca loj crūjz din guiēt reeman yalet tēē reex laa reeman. ³²Zeel wej reex. Yaloy gudi'ch reex xdxijt bēn ca cwē' Jesús, dxel gudi'ch reex xdxijt bēn ca stiblad cwē'man. ³³Chi gubig reex lod ca Jesús, baguiaa reex ma gūjtaman, zeel ad gudi'cht reex xdxijtaman.

³⁴Per tijb suldad guin guxhal ladaman con guiib ca'x, dxel briin rejn con nijs. ³⁵Bēn rü diidx guie baguiaaman, zeel ragbeeman najn diidxli, rüman laan din nē lējt chililadx. ³⁶Gra nine gojc din gac cumplid ni ca loj xtiidx Dios, rēban: “Ad rayalt gach xdxijt xiildoo.” ³⁷Stibljajt rēb: “Guguaa reeman bēn guxhalnē reeman guiib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸Chi gulox gojc zian, wej Xiēb, bēn zēēd guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Nē bēn la Xiēb bililadx Jesús, per ralanzi, guial bidxebaman bejn ree. Badēēd Pilato diidxbee, zeel wej Xiēb bigxiiman xcuerp Jesús. ³⁹Nē Nicodemo wej, bēn bigneenē Jesús tijb guxhin, bidxinnēman cost gajlbichii quil ni la mirra, no'chan aloe, rureen nejxh. ⁴⁰Bagajdxnē reeman laan lajd batüüb reeman laaman, zi'c rüjn ree bēn Israel chi ruquie'ch reeman bengüt. ⁴¹Lod cwa Jesús loj crūjz

naga' tijb guidxliuj lod yu' ree yag. Yagaj naj tijb baa cüb lod achutdzi waguie'ch. ⁴²Yagaj gudixh reeman xcuerpaman, guial najn gajxh, guial ma suloj tää dxej raziiladx reeman.

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

20 Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. ²Dxel ruxüünman wejman lod za' Simón Béd con zatijb xbejn Jesús, bén rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³Abi' brii Béd con bén guin, zë reeman ro' baa guin. ⁴Grop reeman ruxüün zë reeman. Per bén guin mazri ruxüünman guial loj Béd, abi' yaløj laaman bidxin ro' baa guin. ⁵Dxel gudixlojman baguiaaman vend bidüüb Jesús, per ad guyutaman. ⁶Dxelri bidxin Simón Béd, abi' guyuman lën baa guin. Nægajcaman baguiaa vend guin ⁷Baguiaa tääman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸Dxel guyu bén bidxin ro' baa guin yaløj, baguiaaman ni goc, zianz bililadxaman, ⁹guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰Dxel zia ree xbejn Jesús lidx reeman.

Balüüloj Jesús loj María Magdalena

(Mr. 16:9-11)

¹¹Per Li baya'nman ro' baa guin cayoonman. La'tgaj cayoonman

gudixlojman lën baa guin, ¹²abi' baguiaaman tio'p ree anjl, najcw reeman lajd naquich, zobj reeman lod go't xcuerp Jesús, tijbaman lod go't guijcaman, zatijbaman lod go't guia'man. ¹³Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguiilil?

Gunaladx Li, bén rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

¹⁶Zianz rëb Jesús lojman:

—iLi!

Dxel badxi' loj Li, rëbaman lojman con diidx hebreo:

iRabuni! —rën guiëban Mextr.

¹⁷Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bén naj gajc xDadidi, loj da Diosan bén naj gajc xDiosidi.

¹⁸Dxel wej María Magdalena bicojnman xbejn ree Dad Jesús guial baguiaaman laaman, bagojn tääman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹Chidumingw zii gajc chi ma caxhin, bado'p ree xbejn Jesús,

nayaaw ro' port yu' reeman guial
rdxeb reeman guxtis Israel ree.
Dxel balüüloj Jesús galay reeman,
rëbaman loj reeman:

—Yabe'cdxe Dios luxdoodi.

²⁰Chi ma gulox rëbaman zian,
balüü yaaman loj reeman në
cwë'lënman, abi' laa reeman dád
babaa reeman baguiaa reeman Dad
Jesús. ²¹Dxel rëbaman loj reeman
zatiyb:

—Yabe'cdxe Dios luxdoodi. Zi'c
guxhaalaman naj, ziangajc rxhialan
lëjt.

²²Dxel balüjbaman guijc reeman,
rëbaman:

—Gol gubajnnë xSprijt Dios. ²³Bën
güündi perdon xtol, chiquied xtol
reeman, guiáad bën ad züjntidi
perdon xtol, yaya'nnë xtol reeman.

Baguiaa Tumajs Jesús

²⁴Tumajs, bën rniee reeman
Cwajch, achut laaman za' chi
balüüloj Jesús loj ree xbejnman.

²⁵Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguian yaaman lod wëéz
clav, abi' bal id zagu' da bacwënan
lod wëéz clav guin, bal id zagu' tëe
yan cwë'lënman lod bidxeelgujdx,
ad zaliladxtan.

²⁶Chi goc xhujn dxej, badxajg lasa'
ree xbejn Jesús zatiyb, per dxel në
Tumajs za'në laa reeman, nayaaw
ryu yu' reeman. Per balüüloj Jesús
galay reeman, rëbaman loj reeman:

—Yabe'cdxe Dios luxdoodi.

²⁷Dxel rëbaman loj Tumajs:

—Badxe' xbacwënl guie, baguiaa
ree yan, banee yaal guie badxe'n
cwë' lënan. Ad runawëëgril, bililadx.

²⁸Dxel rëb Tumajs lojman:

—iDa Dadan, da Diosan!

²⁹Abi' rëb Jesús lojman:

—Rliladxil guial ma baguiaa naj.
Xiquilbaa ree bën rliladx, majs ad
waguiaa reeman naj.

Chexc zeel cwa gui'ch guie

³⁰Zienri ree milagr been Jesús
loj ree xbejnman, ni ad cwat ree loj
gui'ch guie. ³¹Sa'n nine ree cwa reen
din chililadxidi guial Jesús naj Cristo,
Xi'n Dios, abi' guial chililadxidi
laaman guibandi tiblyaa con Dios.

Balüüloj Jesús loj ree xbejnman ro' nijs

21 Chi gudëd gojc zian,
balüüloj Jesús loj ree
xbejnman zatiyb, ro' nijs naj gajxh
guedx Tiberias. Ze balüülojman:

²Chi nadxag lasa' ree Simón Bëd
con Tumajs bën rniee reeman
Cwajch, në Natanael bën za Caná
guedx riga' niz Galilea, con ree xi'n
Zebedeo, nëtëë zatio'p xbejn Jesús,

³dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë
reeman, per guxhin zii achutcz
bëjl gunaa reeman. ⁴Chi ma
cayreguiaa, bidxin Jesús ro' nijs
guin, per ad bayünbeet reeman
laaman. ⁵Dxel gunabdiidxaman loj
reeman rëbaman:

—Xi'n, ñnid chu bëjl wanaazidi ya?

Badxi' reeman laan rëb reeman:

—Achutcz.

⁶Abi' rëb Jesús loj reeman:

—Gol bazaal xguijxhidi xladbee
barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. ⁷Dxel xbejn Jesús, bén rën da'taman, rëbaman loj Bëd:

—iDad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin.

⁸Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. ⁹Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. ¹⁰Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. ¹²Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán. ¹³Dxel gubigaman cwa'man guidxtil badëëman loj reeman, ziangajc beenman con bëjl guin. ¹⁴Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

¹⁵Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënlnaj mazri guial loj ree bén guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiiloon.

¹⁶Abi' rëb Jesús zatijb:

—Simón, xi'n Waj, ¿walil ya rënlnaj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷Bayon volt gunabdiidx Jesús rëbaman:

—Simón, xi'n Waj, ¿rënlnaj ya?

Dád guyunaya Bëd, guial ma gojchoon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸Diidxliczi ganin, chi goquil xinguiag, rajcw xabil persi rejllod rënln. Per chi ma najl bengol, gusli xu'quil din guscajcw ben ren xabil din chinë reeman lüj lod ad rëntil chel.

¹⁹Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bén guyën da'taman

²⁰Chi badxi' loj Bëd, baguiaaman laa bén rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tëëman loj Jesús rëbaman: “Dad, ¿chu yayü

lūj?” ²¹Chi baguiaa Béd laaman,
gunabdiidxaman loj Jesús rēbaman:
—Dad, laadxza xin guin, ¿xhie
saquix?

²²Badxi' Jesúsán rēbaman:
—Bal rēnan guibanx xt yaguialan,
¿xhie güünl? Lūj tanal naj.

²³Zianan zeel bire'ch diidx loj ree
xbejnman guial ad zējtt bēn guin.

Per ad ziantan rēb Jesús, rēbaman:
“Bal rēnan guibanx xt yaguialan,
¿xhie güünl?”

²⁴Bēn guin gajcan rü diidx xcwent
ree nine, laa tēēman bacaa laan,
rayagbee tēē ree rüman diidxli.

²⁵Dád zien ree ni been Jesús, bal
nitia tijb gajn, wed ad zadaant loj
guidxliuj niu ree libr ni niajc.